

萬 有 文 庫

第 二 集 七 百 種

王 雲 五 主 編

宋 文 鑑

(三)

呂 祖 謙 論 次

商 務 印 書 館 發 行

宋 文 鑑

(三)

呂祖謙諡次

國學基本叢書

宋文鑑卷第十二

詩

四言

皇雅十首

定州閣古堂

裕禮頌聖德

魏京

古風

閔雨

新田

潭州新學

明堂樂章二首

顏樂亭

何公橋

觀棊

尹洙

富弼

梅堯臣

劉敞

劉敞

劉敞

王安石

王安石

王安石

程顥

蘇軾

蘇軾

和陶淵明時運

蘇軾

和陶淵明勸農

蘇軾

江郊

蘇軾

洞酌亭

蘇軾

皇雅十首

尹洙

天監受命也。自梁至于周。兵難不息。宋受命。統一萬方焉。

天監下民。亂靡有定。甚武且仁。祚厥真聖。仁實懷徠。武以執競。匪虔匪劉。拯我大命。自昔外禪。月經日營。令以挾制。政以陰傾。帝初治兵。志勤于征。奄受神器。匪謀而成。淮潞弗虔。卒汙叛逆。戎輅戒嚴。皇威有赫。彼寇註民。吾勇其白。殄厥渠魁。貸其反側。帝朝法宮。左右宗公。伎夫悍士。以雍以容。爾居爾室。爾工爾農。既息既養。惟天子功。

天監四章章八句。

西師征蜀也。

主用西師。岷梁弗賓。匯曰負固。實交晉人。予訓予誓。合我將臣。正厥有罪。無庸傷民。矯矯虎士。載摧其壁。于嗟孟侯。亦果其策。迎師而降。靡抗鋒鏑。豈獨身謀。完是宗國。蜀都既平。將臣失律。此衆悍驕。彼民危慄。當塗叫喚。合萬爲一。匪懷則威。帝心是恤。帝曰將臣。予嘉乃庸。廢命毒民。爾弗有終。邦典用疑。惟罪惟功。靡殛而削。協于厥中。帝曰孟侯。受封于楚。淑旂瑀戈。備物異數。俾爾族姻。及乃文武。服在王庭。靡不有序。

蜀民呼歌。天子威靈。保我者封。暴我者刑。匪功是私。匪弱是陵。天子惠民。疇敢不承。

西師六章。章八句。

耆武受俘也。命將伐南海。平金陵。俘二王以獻。

耆武定功。時惟二方。淮服其義。海南遂荒。孰孱而整。孰暴而猖。自底不諱。乃終滅亡。帝戒二俘。同卽爾誅。予惟民無辜。休息是圖。時其輯矣。寧威獨夫。帝嗟汗邦。久罹于兵。或暴下以征。或敷虐以刑。予命典協于國。經民服德音。室家以寧。

耆武三章。二章八句。一章六句。

憲古令守臣也。削其附庸。以強帝室焉。

帝懷永圖。治古是憲。四方守臣。惟屏惟翰。在昔艱難。弗惠訓典。跨都連城。高牙以建。有土有民。肆乃征繕。以息以容。終焉叛換。凡今帥臣。狃厥聞見。匪革亂原。曷清多難。帝告庶邦。式是典彝。元侯顯父。戚臣宗支。正乃封圻。予一人是毗。凡曰附城。罔爾俾之。畜兵厚賦。靡爾得私。毋凶而國。作福作威。天子有命。疇敢不祇。子孫承承。唯萬世規。

憲古二章。章十六句。

大鹵王師討晉罪也。

冀州之疆。粵惟大鹵。俗伎而專。地扼而固。協比幽都。蕩搖邊圉。三垂旣夷。兇威弗沮。帝御六師。百萬貔虎。翦其附庸。至于城下。鋒鏑始交。梯衝如舞。蠢爾虜王。請附降虜。我士奮揚。願究吾武。皇帝曰吁。念彼黎庶。

匪鯨匪鯢。復爲王土。晉郊旣平。九區以寧。陳功太廟。告假威靈。在昔武王。于商觀兵。維我藝祖。亦勤于征。匪貸晉罪。俟厥貫盈。聖作聖繼。巍巍相承。皇矣二后。功莫與京。

大鹵二章。一章二十二句。一章十四句。

帝籍修故典也。躬耕以劭農焉。

帝籍于郊。典儀具陳。務農以訓。供祀以勤。祀在誠誠。匪勤于人。訓農以實。匪訓以文。帝謹二物。乃躬乃親。公侯卿士。暨厥庶民。千甸有制。飭哉惟寅。帝賚高年。式宴且喜。種種黃髮。族立而議。我生艱難。暴亂以繼。耳聃金鼓。目狎戎器。皇其我圖。親講農事。有子有孫。力田孝悌。鼓舞至仁。薰焉如醉。

帝籍二章。章十四句。

庶工任賢也。

帝咨庶工。疇其輔予。俊乂以登。厥勞乃圖。匪忘舊勳。非賢勿俞。巍巍袞台。盛德以居。任賢伊何。昌言是庸。勉告爾猷。罔恤迺躬。豈無狷辭。怫于予衷。予不爾疵。爾無面從。始時從官。戎容揚揚。今帝左右。儒冠煌煌。朝廷以尊。文物典章。得人之盛。奕世重光。

庶工三章。章八句。

帝制北方請盟也。

帝制萬邦。罔有弗賓。蠻夷戎狄。羈而勿臣。威格三方。稽顙獻珍。單于革心。願交使人。帝謀公卿。列侯庶校。咸曰彼心。暴戾陰狡。旣擾我疆。復利吾寶。無若勵兵。襲其遠道。皇曰有衆。予實念茲。戰無必勝。矧其歸師。

借曰大獲。疇能盡之。益俾餘醜。毒吾朔陲。乃俞其盟。北州以綏。在漢世宗。抗威北戎。暴農算商。經用弗充。中土震騷。漢南始空。降及後世。猶稱厥功。於穆聖考。德無與偕。匪勤于兵。北人遂來。逮是三紀。遠俗以懷。生民休息。嗚呼仁哉。

帝制五章。四章八句。一章十句。

皇治恤刑也。

帝仁于用刑。在位者以寬恤爲治焉。皇底其治。欽哉惟刑。在疑而有。罔察爲明。愛怒弗肆。孰爲重輕。毋一弗辜。惟典之平。前世理官。倚法以刻。匪彼爲仇。蓋曰任職。今之蔽獄。務正其辟。鑒于前人。繫我仁德。皇德在仁。寢而成風。公侯卿士。靡不率從。麇卵萌生。咸保厥終。不鄙不夭。樂哉融融。

皇治三章。章八句。

太平封祀告成功也。

噫。太平無象。兮世烏得而知。維盛德可迹。兮其封祀之儀。東岱宗兮西汾。禮上帝兮賓地。祇皇有征兮。吾民以嬉。皇有祈兮。吾民是私。天敷佑兮。俾皇之釐。永世億寧兮。無疆之基。

太平一章。章八句。

定州閱古堂

富弼

天下十八道。惟河北最重。河北三十六州軍。就其中又析大名府定州。真定府高陽關爲四路。惟定州最要。定爲一路。治所實天下要重之最。知是州者。兼本路兵馬都部署。居則治民。出則治兵。非夫文武才全。

望傾于時者。不能安疆場。屏王室也。然自國初已來。專以武臣帥諸路。慶曆七年。甘陵妖賊據城叛。河北妖黨相搖。以謀應。卒驕將。僭人心大震。天子悟。始議選儒臣帥四路。以督諸將。迺起知鄆州資政殿學士給事中。昌黎韓公帥真定。以遏亂萌。明年春。賊誅人安。既而夏大雨。河決商胡。東北入于海。河北災。人復不寧。流徙失業。者四出。咸不翅千里。僵殍滿道。天子恤然。且虞他姦。遂以公帥定。定既要重。天下宿兵。素多。屬傷殘之後。官民枵困。征賦逃無幾。而兵不少減。兵襲舊幸。歎益驕。以悍。公夙夜裁整。以威以懷。兵之驕不從令者。捽其首。惡斬以徇。略爲條教。餘怙怙就約。不敢譁于室。至有調發者。遠而彌戢。如公親臨。已而招集逋亡。四流爭還。如啼孩奔父母。惟恐其後至。則充然各得其欲。農無廢隴。賦有餘粒。不旁誅橫斂。而上下足。堙漏補罅。一面完固。公既擊彊梗之兵。又有彫瘵之民。左行斧鉞。右哺飲食。亂者畢治。亡者畢存。禮法政教。向之人所不得聞者。今漸濡酣飫。無不貫徹。自是邊人革其耳目。新其肝腸。優爲而樂從。故人易治而功成速也。又明年秋。天子圖公之功。詔加大學士。公先嘗表其志。幸終三年。不願亟易也。至天子抑騎召而使。卽以授。姑遂公請。亦以慰斯人愛公之心也。公惕寵處官。雖無事。未嘗輒自豫。念兵與民之急。宜無過者。矧臨要重之路。憂虞所繫。凡是繪畫。不可以無法。迺擇取歷代賢守良將。摠若干人。行事創大屋。以類相次。繪于周壁。榜之曰閱古堂。蓋欲閱古之人所爲而爲之法也。噫。公雅文傑武。自當視乎古人。且天下方遲公入輔。以致太平。若其安疆場。屏王室。豈庸考古而後能哉。實公冲然。不自有其有。而歸乎古人也。其懸知來者不師繪事而公是師也。雖然。踢古蒐善。惠人警己。公之意。謂其至矣乎。公郵問索詩。因粗序所致之旨。以誌其始。而示于後。詩曰。朔方之兵。勁于九土。尤勁而要。粵惟定武。兵勁在馭。用

則罷虎。失馭而勁。驕不可舉。曰保曰貝。閉壁連阻。武爵斯守。束手就虜。皇帝曰噫。汝武曷取。有敵必革。以
儒于撫。公來帥定。始以威怒。有兵悍橫。一用干斧。連營怛之。膽栗腰偃。既懼而教。如脂如乳。以刺以射。以
鉦以鼓。無一不若。師師旅旅。列城自敕。靡不和附。陰沴爲梗。降此大雨。大河破洩。在河之滸。民被黜墊。田
入污莽。流離蕩析。不得其所。公感曰吁。予敢寧處。迺大招來。乃大保聚。乃營帛粟。寒衣飢茹。民歸而安。水
下孰禦。疆弱死生。由公復慮。曰義曰仁。霜肅春煦。合和蒸天。天順以序。公境獨稔。爰麥爰黍。公俗獨樂。夫
耕婦杼。人雖曰康。公亦奚豫。謂此一方。民與兵具。務劇任重。稽古人裕。人皆謂公。與古爲伍。公文化民。公
武禦侮。何思古人。公不自許。遂擇奇將。繪于堂宇。列其行事。指掌可數。前有古人在我門戶。後有來者依
我墻堵。斯堂勿壞。有堂有故。堂之不存。來者曷覩。宏乎煥乎。千載是矩。

裕禮頌聖德

梅堯臣

溥哉孝享。將事于寧。文武卿士。冠劍在庭。奚俟帝齋。風霰其零。風霰不已。鉤陳豹尾。龍旂太常。立列比比。
帝居路寢。百辟就次。至于穀旦。漫漫翳翳。帝入靈宮。左撞黃鍾。陞階置玉。日氣曛曛。鴻鴻杲杲。氛駁陰掃。
宿于太宮。月星皓皓。侍祠之臣。鵠舉鷺振。或捧其匱。或進其中。輔相夾導。俯僂鮮鱗。圭瓚以陳。登歌以均。
東向虛位。發爵親親。平明帝還。紫宸序班。望帝之顏。穆穆閑閑。簷步廊廊。雪浮陽光。大楹爛爛。朱陛煌煌。
稱祝萬壽。萬壽無疆。卻登寶輿。以御端門。揭雞肆赦。雷動乾坤。于時都人。于時婦女。于時蠻夷。異口同語。
天子萬年。仁聖之主。臣時執冊。與物咸覩。敢播于詩。庶聞九土。

魏京

劉敞

上二十年治建北京以章明先帝巡狩之德以達孝思于下于時野之處士或相與議曰蓋文王都豐武王都鎬豐鎬之間不能數百里文武之位不過侯伯而詩人乃以聖人之德天子之事歌之有如聖朝德位相侔述作相繼而無遜駿烝哉之詩此乃處士之罪非公卿之過也乃考聲譟辭以繼大雅垂之無窮其文曰

皇作大都大都雄雄奄定北國四方來同皇曰卿士在昔聖考祇遜文武維慈幼老天監在上既有明德乃命于下罔有不服匪允命之亦章慶之匪允服之亦保育之時維獵狃侮予之疆靡度靡虞跳呼以狂業業烝黎載震載驚侵魏及澶羣心不寧帝奮厥武百萬其士匪怒以棘于三十里如虎如貔如霆如雷靡有遠邇天子其來天子來止士增其喜孰偷其生以不奮興驅之渾渾攘之賁賁靡有轉張殲厥鯨鯢或獻其寶或請其命帝振于新維時既定屹屹魏土山河之固匪山河則固維上帝伊怒既闕爾弓既囊爾矛獵狃臣之四方是休皇曰卿士聖孝之德允于孝思孝思維則爾眎于魏以作我都以赫厥靈俾後勿踰皇曰卿士維帝時功時亦維人維寇萊公爾敬爾止弼予于治期爾前人用迪爾事皇曰卿士維帝作武垂是萬年莫敢予侮泰山之封后土之禪予監若茲惟天是眷翼翼魏土天子國之穆穆原廟聖人則之孰爲彊暴來觀來覲俾讐于威于忠是訓顯顯天子孝德自躬率是休烈覃之北戎河水東注昭哉禹績時萬斯年天子之德

古風

劉敞

子欲富矣何用爲富農不若工工不若賈子欲貴矣何用爲貴德不若名名不若勢粹兮純兮三五之人

兮終饗且貧兮孰知其珍兮。

閱雨

劉敞

臣伏見春首以來天久不雨。曆官李用晦治大衍軌革。太醫趙從古治黃帝六氣。咸以謂風旱歲惡。然陛下焦心勞意。側躬修德。蕃樂損膳。議獄宥過。以迎導善氣。爰及言事得罪者。唐介杜樞之徒。復特見甄序。小大之臣。莫不欣然。人情悅則天氣和矣。乃三月己巳日入而雨。至于庚午。詩不云乎。益之以霤霖。既優既渥。既霑既足。生我百穀。以此見聖人之德。與天相符。言出而物應。行發而神助。雖水旱之占。有常數者。猶不能違之。況其眇者乎。竊觀詩書所載。盛德之君。至誠動天之速。未有及陛下者也。臣不勝鼓舞之至。謹撰閱雨詩一首。十三章。章六句。投進以聞。

堪輿網緼。一晦一明。或沉而毀。或亢而暘。自古以然。世習爲常。民生冥冥。靡究靡知。其幸而吉。不幸而災。猖狂妄行。唯所遇之。天命降監。在我元聖。兼覆廣裕。四方既定。維民之恤。無所疵病。伊年暮春。旱久不雨。人曰時哉。曆有常數。禹湯之賢。莫能弗遇。帝獨喟息。是豈足言。化育萬物。若鎔以埏。患在誠薄。不能動天。退而齋心。淵默以居。鍾鼓不耘。宴游不娛。左右肅然。一懷瞿瞿。疏獄省刑。與物更始。內恕孔悲。引咎在己。爰及四海。愚智咸喜。追悟讜直。褒進淹滯。聲色無迁。式序在位。嬖習權近。懾威屏氣。己巳乃雨。若有鬼神。淒淒其風。飏飏其雲。自東徂西。馨無不均。匪震匪拔。匪溢匪洩。生曰百穀。區萌畢達。以享以食。小大皆悅。天子之德。視雨之施。肇自京師。達于四裔。無有蠻貊。孚我君惠。天子之政。視雨之時。養老長幼。速哉熙熙。更化易俗。而民不知。天子之慶。視雨之積。自天降康。時萬時億。眉壽無疆。以靖四國。

新田

王安石

唐治四縣田之入於草莽者十九。民如寄客。雖簡其賦。緩其徭。而不可以必留。尚書比部郎中趙君尙寬之來。問弊於民。而知其故。乃使推官張君恂。以兵士興大渠之廢者一。大陂之廢者四。諸小渠陂。教民自爲者數十一年。流民作而相告以歸。二年而淮之南湖之北。操囊耜以率其妻子者。其來如雨。三年而唐之士不可賤取。昔之菽粟者多化而爲稔。環唐皆水矣。唐獨得歲焉。舩漕車輓。負擔出于四境。一日之間。不可爲數。而唐之私廩固有餘。循吏之無稱於世久矣。予聞趙君如此。故爲作詩。詩曰。離離新田。其下流水。孰知其初。灌莽千里。其南背江。其北逾淮。父抱子扶。十百其來。其來僕僕。慢我雜屋。趙侯劬之。作者不饑。歲仍大熟。飽及雞鶩。僦舡與車。四鄙出穀。今游者處。昔止者流。維昔牧我。不如今侯。侯來適野。不有觀者。稅于水濱。問我鰥寡。俟其歸矣。三歲于茲。誰能止侯。我往來之。

潭州新學

王安石

治平元年。天章閣待制興國吳公。治潭州之明年。正月。改築廟學于城東南。越五月告成。孔子用幣。潭人曰。公爲善政以德我。又不勸我。而爲此學以嘉我。士子誰能詩乎。以誦我公於無窮。皆辭不敢。乃使來請詩曰。

有嘉新學。潭守所作。守者誰歟。仲庶氏吳。振養矜寡。衣之襦襦。黔首鼓歌。吏靜不求。乃相廟序。生師所廬。上漏旁穿。燥濕不除。曰。嘻。遷哉。迫阨卑汚。當其壞時。適可以謀營地。慮工伐。榷楠楮。徹故就新。爲此渠渠。潭人來止。相語而喜。我知視成。無豫經始。公升在堂。從者如水。公曰。誨汝潭之士子。古之讀書。凡以爲己。

躬行孝悌。由義而仕。神聽汝助。況於閭里。無實而夸。非聖自是。雖大得意。吾猶汝恥。士下其手。公言無尤。請詩我歌。以遠公休。

明堂樂章二首

王安石

皇帝還大次憩安之曲

有奕明堂。萬方時會。宗子聖考。作帝之配。樂酌虞典。禮從周制。釐事既成。於皇來暨。

欽安之曲

穆穆在堂。肅肅在庭。於顯辟公。來相思成。神既歆止。有聞惟馨。錫我休嘉。燕及羣生。

顏樂亭

程顥

天之生民。是爲物則。非學非師。孰覺孰識。聖賢之分。古難其明。有孔之遇。有顏之生。聖以道化。賢以學行。萬世心目。破昏爲醒。周爰闕里。惟顏舊止。巷汙以榛。井堙而圯。鄉閭蚩蚩。弗視弗履。有卓其誰。師門之嗣。追古念今。有惻其心。良價善諭。發帑出金。巷治以闢。井潔而深。清泉澤物。佳木成陰。載基載落。亭曰顏樂。昔人有心。予忖予度。千載之上。顏惟孔學。百世之下。顏居孔作。盛德彌光。風流日長。道之無疆。古今所常。水不忍廢。地不忍荒。嗚呼正學。其何可忘。

何公橋

蘇軾

天壤之間。水居其多。人之往來。如鶻在河。順水而行。雲駛鳥疾。維水之利。千里咫尺。亂流而涉。過膝則止。維水之害。咫尺千里。沔彼濫觴。蛙跳儼游。溢而懷山。神禹所憂。豈無一木。支此大壞。舞于盤渦。冰拆雷解。

坐使此邦。畫爲兩州。雞犬相聞。胡越莫救。允毅何公。甚勇于仁。始作石梁。其艱其勤。將作復止。更此百難。公心如鐵。非石則堅。公以身先民。以悅使老。壯負石如負其子。疏爲玉虹。隱爲金堤。直欄橫檻。百賈所栖。我來與公同載而出。謹呼填道。抱其馬足。我歎而言。視此滔滔。未見剛者。孰爲此橋。願公千歲。與橋壽考。持節復來。以慰父老。如朱仲卿。食于桐鄉。我作銘詩。子孫不忘。

觀碁

蘇軾

子素不解碁。嘗獨遊廬山白鶴觀。觀中人皆闔戶晝寢。獨聞碁聲於古松流水之間。意欣然喜之。自爾欲學。然終不解也。兒子過乃粗能者。儻守張中日從之戲。予亦隅坐竟日。不以爲厭也。五老峯前。白鶴遺址。長松蔭庭。風日清美。我時獨遊。不逢一士。誰與碁者。戶外屢二。不聞人聲。時聞落子。紋枰坐對。誰究此味。空鈎意釣。豈在魴鯉。小兒近道。剝啄信指。勝固欣然。敗亦可喜。優哉游哉。聊復爾耳。

和陶淵明時運

蘇軾

丁丑二月十四日。白鶴峯新居成。自嘉祐寺遷入。詠淵明時運詩云。斯晨斯夕。言息其廬。似爲余發也。乃次其韻。長子邁。與予別三年矣。挈攜諸孫。萬里遠至。老朽憂患之餘。不能無欣然。我卜我居。居非一朝。龜不吾欺。食此江郊。廢井已塞。喬木干霄。昔人伊何。誰其裔苗。下有碧潭。可飲可濯。江山千里。供我遐矚。木固無脛。瓦豈有足。陶匠自至。嘯歌相樂。我視此邦。如洙如沂。邦人勸我。老矣安歸。自我幽獨。倚門或揮。豈無親友。雲散莫追。旦朝丁丁。誰款我廬。子孫遠至。笑語紛如。翦髮垂髻。覆此瓠壺。三年一夢。乃復見余。

和陶淵明勸農

蘇軾

海南多荒田。俗以質香爲業。所產杭稌。不足於食。乃以諸時諸芋雜米作粥糜以取飽。予旣哀之。乃和淵明勸農詩以告其有知者。

咨爾漢黎。均是一民。鄙夷不訓。夫豈其真。怨忿劫質。尋戈相因。欺謾莫訴。曲自我人。天旤爾土。不麥不稷。民無用物。怪珍是植。播厥薰木。腐餘是穡。貪夫汚吏。鷹擊狼食。豈無良田。膾膾平陸。獸蹤交締。烏喙諧穆。驚麋朝射。猛豨夜逐。芋蕘諸麋。以飽耆宿。聽我苦言。其福永久。利爾鉏耜。好爾鄰偶。斬艾蓬蒿。南東其畝。父兄搢挺。以扶游手。天不假易。亦不汝匱。春無遺勤。秋有後冀。雲舉雨決。婦姑畢至。我良孝愛。袒跣何愧。逸諺戲侮。博奕頑鄙。投之生黎。俾勿冠履。霜降稻實。千箱一軌。大作爾社。一醉醇美。

江郊

蘇軾

惠州歸善縣治之北。數百步抵江。少西有盤石小潭。可以垂釣。作江郊詩云。江郊葱曩。雲水舊綯。磻岸斗入。洄潭輪轉。先生悅之。布席閒燕。初日下照。潛鱗俯見。意釣忘魚。樂此竿綫。優哉悠哉。玩物之變。

洞酌亭

蘇軾

瓊山郡東。衆泉噴發。然皆冽而不食。丁丑歲六月。軾南遷過瓊。始得雙泉之甘於城之東北隅。以告其人。自是汲者常滿。泉相去咫尺而異味。庚辰歲六月十七日。遷于合浦。復過之。太守承議郎陸公求泉上之亭名與詩。名之曰洞酌。其詩曰。

洞酌彼兩泉。挹彼注茲。一餅之中。有澠有淄。以淪以烹。衆噉莫齊。自江徂海。浩然無私。豈弟君子。江海是儀。既味我泉。亦疇我詩。

宋文鑑卷第十三

詩

樂府歌行雜言附

桃花犬歌呈修史錢侍郎

江南春

西遊曲

伐棘篇

吳中曉寒曲

清輝殿觀明皇山水石字歌應制

鸚鵡詞

明妃曲

廬山高贈同年劉中允歸南康

紫石屏歌

山鳥

送撫州通判袁世弼寺丞

李至

寇準

錢易

路振

王琪

王琪

歐陽修

歐陽修

歐陽修

歐陽修

梅堯臣

梅堯臣

永叔月石硯屏

荒田行

桃源行

食黍行

杜甫畫像

題燈

鞠歌行

君子行

上書行

茂陵徐生歌

熙州行

江南曲

織婦怨

自君之出矣

五原行

法惠寺橫翠閣

蘇舜欽

劉敞

王安石

王安石

王安石

陳烈

張載

張載

劉敞

劉敞

劉敞

沈括

文同

文同

文同

蘇軾

於潛僧綠筠軒

河復

禽言二首

書王定國所藏煙江疊嶂圖

書晁說之考牧圖後

鶴歎

荔枝歎

東方書生行

和謝公定征南謠

以團茶洮州綠石研贈無咎文潛

贈送張叔和

平南謠

打麥

勿去草

妾薄命

古墨

蘇軾

蘇軾

蘇軾

蘇軾

蘇軾

蘇軾

蘇軾

蘇轍

黃庭堅

黃庭堅

黃庭堅

楊蟠

張舜民

楊傑

陳師道

陳師道

桃花犬歌呈修史錢侍郎

李至

宮中有犬桃花名。絳繒圍頸懸金鈴。先皇爲愛馴且異。指顧之間知上意。珠簾未卷扇未開。桃花搖尾長生至。夜靜不離香砌眠。朝飢祇傍御牀餞。彩雲路熟不勞牽。瑤草風微有時吠。無何軒后鑄鼎成。忽遺弓劍棄寰瀛。迢迢松闕伊川上。遠逐龍輻十數程。兩背漣漣似垂淚。骨見毛寒頓憔悴。萬人見者倍傷心。微物感恩猶若是。韓盧備獵何足嘉。西旅充庭豈爲瑞。聞君奉詔修實錄。一字爲褒應不曲。白魚赤鴈且勿書。願君書此懲浮俗。

江南春

寇準

波渺渺。柳依依。孤村芳草遠。斜日杏花飛。江南春盡離腸斷。蘋滿汀洲人未歸。

西遊曲

錢易

花銷秋老白日短。敗紅荒綠迷空館。擬將清血洒昭陵。幽谷蛇啼半山晚。十年辭家勤獻書。王孫不許延公車。江頭祖廟祭無血。重門生草寒離離。我有黃金三尺劍。姦骨餘痕古波艷。佩入函關無故人。玉握凋零七星暗。

伐棘篇

路振

伐棘何所山之巔。秋風騷颺棘子丹。折根破柢堅且頑。斲夫赳赳汗汗顏。攢鋒束芒趨道還。稔之森森綠長藩。暮冬號風雪暗天。漏寒不鳴守犬眠。主人堂上多金錢。東陵暴客來窺垣。舉手觸鋒身隕顛。千矛萬戟爭後先。襟袖結裂不可揜。蹠破指傷流血殷。神離氣沮走踟躕。數尺之墻弗復攀。索頭醜奴搔河壩。朔

方屯師連七年。木波馬領沙填填。氣脈不絕如喉咽。官軍虎怒思吼軒。強弩一發山河穿。將不叶謀空即安。翫養小醜成兇顛。推芻挽粟徒喧喧。邊臣無心靜國艱。爲余諷此伐棘篇。

吳中曉寒曲

王琪

大澤穹天莽同色。碧瓦閭門曉花白。石岩左右斷行人。洞庭一夜冰千尺。曾持漢節單于北。雪舞金山風卷積。卻憐凍足幸雙摧。一生不向胡廷屈。今年補郡來南州。中吳風土清且柔。令嚴氣正天地肅。忽驚身被貂裘裘。玉蘭酒熟金醅溢。大白連雲尙難敵。長松雖老不須憂。幾日紅梅斷消息。

清輝殿觀唐明皇山水石字歌應制

王琪

皇家四葉恢聖功。天臨日燭清華戎。漢條靜治洽柔教。堯心稽古開神聰。有唐英主稱好文。仙毫灑落驅風雲。壯哉山水有奇字。煥乎八法存翠珉。自從棄置咸陽道。薜駁煙滋委宮草。天開神贊會休辰。甄改再作皇居寶。如何淪廢三百春。迎逢睿鑒來紫宸。奎鈞粲粲光華動。羣玉森森氣象新。丹籙春妍瑞靄深。文梁藻棟結芳林。鴻翔鳳翥徑方丈。杯流泉涌蒙親臨。鰕臣榮幸從金輿。鈞婉魂驚拭目初。多慙攬筆非清藻。唯慶千齡際帝圖。

鶉鳩詞效王建作

歐陽修

龍樓鳳閣鬱崢嶸。深宮不聞更漏聲。紅紗蠟燭愁夜短。綠窗鶉鳩催天明。一聲兩聲人漸起。金井轆轤聞汲水。三聲四聲促嚴粧。紅靴玉帶奉君王。萬年枝軟風露濕。上下枝間聲轉急。南衙促仗三衛列。九門放鑰千官入。重城禁籞瑣池臺。此鳥飛從何處來。君不見潁河東岸村陂闕。山禽野鳥常嘲啮。田家惟聽夏

雞聲鷓鴣京四村人謂之夏雞夜夜墮頭耕曉月。可憐此樂獨吾知。眷戀君恩今白髮。

明妃曲

歐陽修

漢宮有佳人。天子初未識。一朝隨漢使。遠嫁單于國。絕色天下無。一失難再得。雖能殺畫工。於事竟何益。耳目所及尚如此。萬里安能制夷狄。漢計誠已拙。女色難自誇。明妃去時淚。灑向枝上花。狂風日暮起。飄泊落誰家。紅顏勝人多薄命。莫怨春風當自嗟。

廬山高贈同年劉中允歸南康

歐陽修

廬山高哉幾千仞。根盤幾百里。巖然屹立乎長江。長江西來走其下。是爲揚瀾左里兮。洪濤巨浪日夕相舂撞。雲消風止水鏡靜。泊舟登岸而遠望兮。上摩青蒼以瞻籟。下壓后土之鴻龐。試往造乎其間兮。攀緣石磴窺空壑。千巖萬壑響松檜。懸崖巨石飛流淙。水聲聒聒亂人語。六月飛雪灑石缸。仙翁釋子亦往往而逢兮。吾嘗惡其學幻而言咙。但見丹崖翠壁遠近映樓閣。晨鍾暮鼓杳靄羅幡幢。幽花野草不知其名兮。風吹露濕香澗谷。時有白鶴飛來雙。幽尋遠去不可極。使欲絕世遺紛靡。羨君買田築室老其下。插秧盈疇兮釀酒盈缸。欲令浮嵐暖翠千萬狀。坐臥常對乎軒窗。君懷磊砢有至寶。世俗不辨珉與玳。策名爲吏二十載。青衫白首困一邦。寵榮聲利不可以苟屈兮。自非青雲白石有深趣。其氣兀肆何由降。丈夫壯節似君少。嗟我欲說安得巨筆如長杠。

紫石屏歌寄蘇子美

歐陽修

月從海底來。行上天東南。正當天中時。下照千尺潭。潭心無風月不動。倒影射入紫石巖。月光水潔石瑩

淨感此陰魄來中潛。自從月入此石中。天有兩耀分爲三。清光萬古不磨滅。天地至寶難藏緘。天公呼雷公。夜持巨斧墮巖巖。墮此一片落千仞。皎然寒鏡在玉奩。蝦蟆白兔走天上。空留桂影猶杉杉。景山得之惜不得。贈我意與千金兼。自云每到月滿時。石在暗室光出簷。大哉天地閒。萬怪難悉談。嗟予不度量。每事思窮探。欲將兩耳目所及。而與造化爭毫纖。煌煌三辰行。日月尤尊嚴。若今下與物爲比。去聲擾擾萬類將誰瞻。不然此石竟何物。有口欲說嗟如鉗。吾奇蘇子胸。羅列萬象中包含。不惟胸寬膽亦大。屢出言語驚愚凡。自吾得此石。未見蘇子心懷慚。不經老匠先指決。有手誰敢施鑄鑿。呼工畫石持寄似。幸子留意其無謙。

山鳥

梅堯臣

婆餅焦兒不食。爾父向何之。爾母山頭化爲石。山頭化石可奈何。遂作微禽啼不息。

送撫州通判袁世弼寺丞

梅堯臣

帆疏疏。纒綠蒲。二十四幅輕江湖。高秋逆水上天去。朝過瓜步暮濡須。長風沙頭問鯉魚。大孤山側鳴寒鳥。魚腹無書報家信。憑鳥爲到西山區。西山松柏應更好。及取之官來拜掃。

永叔月石硯屏歌

蘇舜欽

日月行上天。下照萬物根。向之生榮背則死。故爲萬物生死門。東西兩交征。晝夜不暫停。胡爲號山石。留此皎月痕。常存桂樹散疎陰。有若圖畫成。永叔得之不能曉。作歌使我窮其源。且疑月入此石中。分此兩曜三處明。或云蟾蜍好溪山。逃遁出月不可關。浮波穴石恣所樂。常娥孤坐初不覺。玉杵夜無聲。無物來

搗藥常娥驚推輪。下天自尋捉。遠地掀江踏山岳。二物驚奔不復見。留此玉輪之迹在青壁。風雨不可剝。此說亦詭異。予知未精確。物有無情自相感。不聞幽微與高邈。老蚌吸月月降胎。水犀望星星入角。彤霞爍石變靈砂。白虹貫巖生美璞。此乃西山石。久爲月照著。歲久光不滅。遂有團團月。寒輝籠籠出輕霧。坐對不復嗟殘缺。蝦蟆從汝惡齧吻。可能食此清光沒。玉川子若在。見必喜不徹。此雖隱石中。時有靈光發。土怪山鬼不敢近。照之僵仆肝腦裂。有如君上明。下燭萬類無遁形。光艷百世無虧盈。

荒田行

劉敞

大農棄田避征役。小農挈家就兵籍。良田茫茫少耕者。秋來雨止生荆棘。縣官募兵有著令。募兵如率官有慶。從今無復官勸農。還逐魚鹽作亡命。

桃源行

王安石

望夷宮中鹿爲馬。秦人半死長城下。避世不獨商山翁。亦有桃源種桃者。此來種桃經幾春。採花食實枝爲薪。兒孫生長與世隔。雖有父子無君臣。漁郎漾舟迷遠近。花間相見驚相問。世上那知古有秦。山中豈料今爲晉。聞道長安吹戰塵。春風回首一霑巾。重華一去寧復得。天下紛紛經幾秦。

食黍行

王安石

周公兄弟相殺戮。李斯父子夷三族。富貴常多患禍嬰。貧賤亦復難爲情。自隨衣食南與北。至親安能常在側。謂言黍熟同一炊。歛見隴上黃離離。遊人中道忽不返。從此食黍還心悲。

杜甫畫像

王安石

吾觀少陵詩。謂與元氣侔。力能排天幹。九地壯顏毅。色不可求。浩蕩八極中。生物豈不稠。醜妍巨細千萬殊。竟莫見何以雕鏤。惜哉命之窮。顛倒不見收。青衫老更斥。餓走半九州。瘦妻僵前子。仆後攘攘盜賊森。戈矛吟哦當此時。不廢朝廷憂。嘗願天子聖。大臣各伊周。寧令吾廬獨破受凍死。不忍四海赤子寒飢飢。傷屯倬屈止一身。嗟時之人我所羞。所以見公像。再拜涕泗流。推公之心古亦少。願起公死從之游。

題燈

陳烈

富家一碗燈。太倉一粒粟。貧家一碗燈。父子相聚哭。風流太守知不知。惟恨笙歌無妙曲。

鞠歌行

張載

鞠歌胡然兮。邈余樂之不猶。宵耿耿其尙寐。日孜孜焉繼子乎厥修。井行惻兮王收。曰曷賈不售兮。阻德音其幽幽。述空文以繼志兮。庶感通乎來古。攀昔爲之純英兮。又申申其以告。鼓弗躍兮。靡弗前。千五百年。寥哉寂焉。謂天實爲兮。則吾豈敢羌審己兮。乾乾。

君子行

張載

君子防未然。見幾天地先。開物象未形。弭災憂患前。公旦立無方。不恤流言喧。將聖見亂人。天厭懲孤偏。竊攘豈予思。瓜李安足論。

上書行

劉攽

仕不至二千石。賈不至五百萬。此事夸者憂。而非志士歎。君不見下邳少年受書起。幄中運籌制千里。功成不受三萬戶。拂衣歸從赤松子。君不見計然半策誅強吳。鷗夷扁舟浮五湖。三致千金不自擅。至今籍

籍宗陶朱。大賢富貴不爲己。心事邈與常人殊。逢時致身如反手。雲蒸龍變無時無。君勿愛上書獻賦稱賢豪。刺繡倚市相矜高。丈夫昔曾笑徒勞。商賈旦旦爭錐刀。

茂陵徐生歌

劉敞

茂陵徐生老且迂。一心區區長信書。拜章北闕三待報。意欲霍氏安無虞。那知世主心不同。積惡未極難爲功。徒薪曲突事不爾。壯侯幾人當受封。高岸爲谷丘淵移。魯酒之薄邯鄲圍。人生快己各以時。舊意望君君不思。

熙州行

劉敞

自胡請盟供貢職。關西二紀剽兵革。胡人歲來受金帛。地雖國本胡不惜。帝家將軍勇無敵。謀如轉圜心匪席。精誠動天天不隔。鑿空借籌皆碩畫。賈生屬國試五餌。買臣朔方發十策。偏師倏然盡西海。一月三捷猶餘力。百蠻解辮慕冠帶。五郡掃地開城壁。葱嶺陂陀蒲類深。回笑秦并與禹績。尙書論功易等差。御史行封自明白。武功地爵十萬金。徹侯印組丈二尺。奮行過望理自爾。少從進熟來無極。憶昔漢武開西域。天下騷然苦征役。哀痛輪臺置肥美。割棄造陽捐斗僻。豈知洮河宜種稻。此去涼州皆白麥。女桑被野水泉甘。吳兒力耕秦婦織。行子雖爲萬里程。居人坐盈九年食。熙州歡娛軍事息。天王聖明丞相直。

江南曲

沈括

新秋拂水無行跡。夜夜隨潮過江北。西風卷雨上半天。渡口微涼含晚碧。城頭鼓響日腳垂。天際籠煙鎖山色。高樓索莫臨長陌。黃竹一聲無北客。時平田苦少人耕。唯有蘆花滿江白。

織婦怨

文同

擲梭兩肘倦。踏籜雙足趼。三日不住織。一疋纔可翦。織處畏風日。翦時審刀尺。皆言邊幅好。自愛經緯密。昨朝持入庫。何事監官怒。大字彫印文。濃和油墨汗。父母抱歸舍。拋下中門下。相看各無語。淚迸若傾瀉。質錢解衣服。買絲添上軸。不敢輒下機。連宵停火燭。當須了租賦。豈暇恤襦袴。前知寒切骨。甘心肩胛露。里胥踞門限。叫罵嗔納晚。安得織婦心。變作監官眼。

自君之出矣

文同

自君之出矣。弔影度晨夕。中門一步地。未省有行迹。闐闐足儀檢。常恐犯繩尺。欲寄錦字書。知誰者云的。

五原行

文同

雲蕭蕭。草搖落。風吹黃沙昏。寂寞胡兒滿窟臥。寒日卓旗繫馬人一匹。夜來烽火連籌起。銀鶻呼兵捷如鬼。齊集弓刀上隴行。大譟狐嗥繞空壘。羌人鈔暴爲常事。見敵不爭收若雨。自高聲勢殺邊功。歲歲年年皆一同。將軍玩寇五原上。朝廷不知但推賞。

法惠寺橫翠閣

蘇軾

朝見吳山橫。暮見吳山從。吳山故多態。轉側爲君容。幽人起朱閣。空洞更無物。惟有千步岡。東西作簾額。春來故國歸無期。人言悲秋春更悲。已泛平湖思濯錦。更看橫翠憶峨眉。彫欄能得幾時好。不獨憑欄人易老。百年興衰更堪哀。懸知草莽化池臺。遊人尋我舊遊處。但覓吳山橫處來。

於潛僧綠筠軒

蘇軾

可使食無肉。不可使居無竹。無肉令人瘦。無竹令人俗。人瘦尚可肥。俗士不可醫。旁人笑此言。似高還似癡。若對此君仍大嚼。世間那有楊州鶴。

河復

蘇軾

熙寧十年秋。河決澶淵。注鉅野。入淮泗。自澶魏以北皆絕流。而齊楚大被其害。彭門城下水二丈八尺。七十餘日不退。吏民疲於守禦。十月十三日。澶州大風終日。既止。而河流一枝已復故道。聞之喜甚。庶幾可塞乎。乃作河復詩。歌之道路。以致民願。而迎神休。蓋守土者之志也。

君不見西漢元光元封閒。河決瓠子二十年。鉅野東傾淮泗滿。楚人恣食黃河鱧。萬里沙回封禪罷。初遣越巫沈白馬。河公未許人力窮。薪芻萬計隨流下。吾君仁聖如帝堯。百神受職河神驕。帝遣風師下約束。北流夜起澶州橋。東風吹凍收微綠。神功不用淇園竹。楚人種麥滿河淤。仰看浮槎棲古木。

禽言二首

蘇軾

南山昨夜雨。西溪不可渡。溪邊布穀兒。勸我脫破袴。不辭脫袴溪水寒。水中照見催租瘢。土人謂布穀為脫卻破袴。姑惡姑惡。姑不惡。妾命薄。君不見。東海孝婦死作三年乾。不如廣漢龐姑去。卻還。姑惡水鳥也。俗云婦以姑虐死。故其聲云。

書王定國所藏煙江疊嶂圖

蘇軾

江上愁心千疊山。浮空積翠如雲煙。煙耶雲耶遠莫知。煙空雲散山依然。但見兩崖蒼蒼暗絕谷。中有百道飛來泉。縈林絡石隱復見。下赴谷口為奔川。川平山開林麓斷。小橋野店依山前。行人稍度喬木外。漁舟一葉江吞天。使君何從得此本。點綴毫末分清妍。不知人閒何處有此景。徑欲往置二頃田。君不見武

昌樊口幽絕處。東坡先生留五年。春風搖江天漠漠。暮雲捲雨山娟娟。丹楓翻鷓伴水宿。長松落雪驚晝眠。桃花流水在人世。武陵豈必皆神仙。江山清空我塵土。雖有去路尋無緣。還君此畫三歎息。山中故人應有招我歸來篇。

書晁說之考牧圖後

蘇軾

我昔在田閒。但知羊與牛。川平牛背穩。如駕百斛舟。舟行無人岸自移。我臥讀書牛不知。前有百尾羊。聽我鞭聲如鼓鼙。我鞭不妄發。視其後者而鞭之。澤中草木長。草長病牛羊。尋山跨坑谷。騰踴筋骨強。煙蓑雨笠長林下。老去而今空見畫。世閒馬耳射東風。悔不長作多牛翁。

鶴歎

蘇軾

園中有鶴馴可呼。我欲呼之立坐隅。鶴有顏色側睨余。豈欲臆對如鵬乎。我生如寄良畸孤。三尺長頸闊瘦軀。俛啄少許便有餘。何至以身爲子娛。驅之上堂立斯須。投以餅餌視若無。噉然長鳴乃下趨。難進易退我不如。

荔枝歎

蘇軾

十里一置飛塵灰。五里一候兵火催。填坑赴谷相枕藉。知是荔枝龍眼來。飛車跨山鶻橫海。風枝露葉如新採。宮中美人一破顏。驚塵濺血留千載。永元荔枝來交州。天寶歲貢取之涪。至今欲食林甫肉。無人舉觴酌伯游。我願天公怜赤子。莫生尤物爲瘡痍。君不見武夷溪邊粟粒芽。前丁後蔡相籠加。爭先取寵稱入貢。今年鬪品充官茶。吾君所乏豈在此。致養口體何陋耶。洛陽相君忠孝家。近時亦進姚黃花。

東方書生行

蘇轍

東方書生多愚魯。閉門讀書口生土。窗中白首抱遺經。自信此書傳父祖。辟雍新說從上公。册除僕射酬元功。太常弟子不知數。日夜吟諷如寒蟲。四方窺覘不能得。一卷百金猶復惜。康成穎達棄塵灰。老聃瞿曇更出入。舊書句句傳先師。中途欲棄還自疑。東隣小兒識機會。半年外舍無不知。乘輕策肥正年少。齒疎唇腐真堪笑。是非得失付它年。眼前且買先騰蹕。

和謝公定征南謠

黃庭堅

傳聞交州初陸梁。東連五溪西氏羌。軍行不斷蠻標盾。謀主皆收漢叛亡。合浦譙門腥血沸。晉興城下白骨荒。謀臣異時坐致寇。守臣今日愧包桑。已遣戈船下離水。更分樓船浮豫章。頗聞師出三鷓路。盡是中屯六郡良。漢南食麥如食玉。湖南驅人如驅羊。營平請穀三百萬。祁連引兵九千里。少府私錢不可知。大農計歲今餘幾。土兵蕃馬貔虎同。蝮虺毒草篁竹中。未論芻粟捐金費。直愁瘴癘連營空。我思荊州李太守。欲募蠻夷令自攻。至今民歌尹殺我。州郡擇人誠見功。張喬祝良不難得。誰借前箸開天聰。詔書哀痛言語切。爲民一洗橫尸血。摧鋒陷堅賞萬戶。塹山堙谷窮三穴。南平舊時頗臣順。欲獻封疆請旄節。廟謀猶計病中原。豈知一朝更屠滅。天道從來不爭勝。功臣好爲可喜說。交州雞肋安足貪。漢開九郡勞臣監。呂嘉不肯佩銀印。徵側持戈敵百男。君不見往年瀕海未郡縣。趙佗閉關罷朝獻。老翁竊帝聊自娛。白頭抱孫思事漢。孝文親遣勞苦書。稽首請去黃屋車。得一亡十終不忍。太宗之仁千古無。

以團茶洮州綠石妍贈無咎文潛

黃庭堅

鬼子智囊可以括四海。張子筆端可以回萬牛。自我得二士。意氣傾九州。道山延閣委竹帛。清都太微望冕旒。貝宮胎蹇弄明月。天綱下罩一日收。此地要須無不有。紫皇訪問富春秋。晁無咎。贈君越侯所貢蒼玉璧。可烹玉塵試春色。澆君胸中過秦論。斟酌古今來活國。張文潛。贈君洮州綠石含風漪。能淬筆鋒利如錐。請書元祐開皇極。第入思齊訪落詩。

贈送張叔和

黃庭堅

張侯溫如鄒子律。能令陰谷黍生春。有齊先君之季女。十年擇對無可人。箕帚掃公堂上塵。家風孝友故相親。廟中時薦南澗蘋。兒女衣袴得補紉。兩家俱爲白頭計。察公與人意甚真。吏能束縛老姦手。要使鰥寡無鬻呻。但回此光還照己。平生倦學皆日新。我提養生之四印。君家所有更贈君。百戰百勝不如一忍。萬言萬當不如一默。無可簡擇眼界平。不藏秋毫心地直。我肱三折得此醫。自覺兩踵生光輝。團蒲日靜鳥吟時。鑪薰一炷試觀之。

平南謠

楊蟠

海南山似刀。溪惡如發弩。溪山毒煙中人骨。水有蛟蜃陸豺虎。蠻人佯賊行若飛。縱火劫民殺官府。溪中之水漲赤血。山頭積屍變成土。經年鬪戰兵已窮。礮將屠城不可數。官家發軍救死國。萬里歡喜得時雨。誅擒凶黨功德高。海水一清奏歌舞。山非無險水非無阻。有地不城城亦不武。將民赤肉致戈戟。口不能言心自苦。

打麥

張舜民

打麥打麥。彭彭魄魄。聲在山南。應山北。五月太陽出東北。才離海嶠。麥尚青。轉到天心。麥已熟。鷓旦催人。夜不眠。竹鷄呼雨。雲如墨。大婦腰鎌出。小婦具筐逐。上壠先捋青。下壠已成束。田家以苦乃爲樂。敢憚頭枯面焦黑。貴人薦廟已嘗新。酒醴雍谷會所親。曲終厭飫勞僮僕。豈信田家未入脣。盡將精好輸公賦。次把斗升求市人。麥秋正急又秧禾。豐歲自少凶歲多。田家辛苦可奈何。將此打麥詞。兼作插禾歌。

勿去草

楊傑

勿去草。草無惡。若比世俗。俗浮薄。君不見。長安公卿家。公卿盛時客。如麻。公卿去後。門無車。唯有芳草。年年加。又不見。千里萬里。江湖濱。觸目淒淒無故人。唯有芳草。隨車輪。一日還舊居。門前草先除。草於主人實無負。主人於草宜何如。勿去草。草無惡。若比世俗。俗浮薄。

妾薄命

陳師道

主家十二樓。一身當三千。古來妾薄命。事主不盡年。起舞爲主壽。相送南陽阡。忍着主衣裳。爲人作春妍。有聲當徹天。有淚當徹泉。死者恐無知。妾身長自憐。

古墨行

陳師道

晁無斃。有李墨半丸。云裕陵故物也。往於秦少游家。見李墨。不爲文理。質如金石。亦裕陵所賜。王平甫所藏者。潘谷見之。再拜云。真廷珪所作也。世惟王四學士有之。與此爲二矣。嗟乎。世不乏奇。乏識者耳。敬爲長句。率無斃同作。

秦郎百好俱第一。墨丸如漆姿如石。巧作松身與鏡面。借美於外非良質。潘翁拜跪摩老眼。一生再見三

歎息了知至鑒無遁形。王家舊物秦家得。君今所有亦其亞。伯仲小低猶子姪。黃金白璧孰不有。古錦句囊聊可敵。容思殿裏春夜半。燈火闌殘歌舞散。自書細字答邊臣。萬里風塵入長算。初聞橋山送弓劍。寧知玉盃人間見。夜光炎炎衝斗牛。會有太史占星變。人生尤物不必有。時一過目驚老醜。念子何忍遽磨研。少待須臾圖不朽。明窗淨几風日暖。有愁萬斛才八斗。徑須脫帽管城公。小試玉堂揮翰手。

宋文鑑卷第十四

詩

樂府歌行 雜言附

勞歌

江南曲

牧牛兒

孫彥古畫風雨山水歌

于湖曲

秋雨歎

觀易元吉猿獐圖歌

豆葉黃

漁家傲

蓮根有長絲

金山行

驪山歌

宋文鑑 卷第十四

張未

張未

張未

張未

張未

許彥國

秦觀

晁補之

晁補之

郭祥正

郭祥正

李鷹

築長堤

田晝

叢臺歌

賀鑄

五言古詩

戒兒姪八百字

范質

懷賢詩

王禹偁

五哀詩

王禹偁

橄欖

王禹偁

勸學篇

張詠

悼蜀詩四十韻

張詠

愆亢取湫水徵巫覡致禱亟遣罷去越翊日漸獲優洽

劉筠

寄岳陽劉從事

韓丕

溫泉詩

錢易

夏日山居

种放

諭蒙詩

种放

樂府歌行

勞歌

張耒

暑天三月元無雨。雲頭不合惟飛土。深堂無人午睡餘。欲動身先汗如雨。忽憐長街負重民。筋骸長穀十石弩。半衲遮背是生涯。以力受金飽兒女。人家牛馬繫高木。惜恐牛驅犯炎酷。天工作民良久難。誰知不如牛馬福。

江南曲

張耒

江蒲芽白江水綠。江頭花開自幽淑。人家晨炊欲熟時。旋去網魚惟所欲。往來送租只用船。未省泥沙曾汗足。有錢買酒醉鄰畔。終日數口常在目。不學長安貴公卿。每遣離心寄朱轂。朝游巖廊暮海島。譴人未歸身自逐。

牧牛兒

張耒

牧牛兒。遠陂牧。遠陂牧。牛芳草綠。兒怒掉鞭牛不觸。潤邊柳。古南風清。麥深蔽目。田野平。烏犍礪角逐草行。老犍臥。嗷飢不鳴。犢兒跳梁沒草去。隔林應母時一聲。老翁念兒自携餉。出門先上崗頭望。日斜風雨濕蓑衣。拍手唱歌尋伴歸。遠村放牧風日薄。近村牧牛泥水惡。珠璣燕趙兒不知。兒生但知牛背樂。

孫彥古畫風雨山水歌

張耒

山深巖高石壁青。白日忽變天晦冥。黑風驅雲走不停。驚電疾雨來如傾。山前雨點大如手。山下水湧危槎橫。崩崖古樹老有靈。吼怒直與風雲爭。枝披葉偃鬪不怯。萬竅却欲藏雷霆。鞭驢疾驅者誰子。石路嶮澀驢凌兢。目迷心懾愈走愈不及。來憩樹下如寒蠅。蒼茫直與鬼神接。恍惚不保龍蛇驚。平居此樂忽入眼。孫家古圖才可辨。柰何一幅一尺餘。欲奪天地之奇變。我心愛之良有以。昔若山行親遇此。一生兩足

不下堂。輸爾朱門貴公子。

于湖曲

張耒

蕪湖令寄示溫庭筠湖陰曲。其序乃云。晉王敦反。屯于湖陰。帝微行至其營。敦夢日邊之覺。而追不及。故樂府有湖陰曲。按晉地志有于湖。而無湖陰。本記云。敦屯于湖。又曰。帝至于湖。陰察營壘而去。予頃遊蕪湖。問父老湖陰所在。皆莫知之也。然則帝至于湖。當爲斷句。乃作于湖曲。以遺之。使正其是非云。

武昌雲旗蔽天赤。夜築于湖洗鋒鏑。巴滇綠駿風作蹄。去如滅沒來不嘶。日圍萬里纏孤壁。虜氣如霜已潛釋。蛇矛賤士識天顏。玉帳髯奴落妖魄。君不見銅駝陌上塵沙起。胡騎春來飲灑水。浮江天馬是龍兒。蹙踏揚州開帝里。王氣高懸五百秋。弄兵老漢空白頭。石城戰骨臥秋草。更欲君王分上流。

秋雨歎

許彥國

霖雨不出動隔旬。門前秋草長於人。江湖浩渺欲無岸。錦石最小猶生雲。微陽片月何曾見。只有莓苔香筆硯。田家黍穗未暇悲。茅屋且爲螢火飛。

觀易元吉猿獠圖歌

秦觀

參天老木相樛枝。嵌空怪石銜青漪。兩猿上下一旁掛。兩猿熟視蒼蛙疑。蕭蕭叢竹山風吹。海棠杜宇相因依。下有兩獠從兩兒。花殮草嚼含春嬉。藝老筆精湖海推。書意忘形形更奇。解衣一掃神扶持。他日自見猶嗟咨。金錢百萬酒千鴟。荆南將軍欣得之。老禪豪取囊爲垂。白晝掩門初許窺。房櫺炯炯明冬曦。榛藜羽革分毫釐。殘編未終且歸讀。歲暮有閒重借披。

豆葉黃

晁補之

兼葭蒼。豆葉黃。南村不見岡。北村十頃強。東家車滿箱。西家未上場。豆葉黃。野離離。鼠窟之。兔入畦。豕母從豚兒。豕豚啼。啾啾。銜角復銜其。豆葉黃。穀又熟。翁媪衰。舖糜粥。豆葉黃。葉黃不獨豆。白黍堪作酒。瓠大棗紅皺。豆葉黃。穰穰何。靡靡腰。鎌獨健婦。大男往何許。官家散弓刀。要汝殺賊去。

漁家傲

晁補之

漁家人言傲。城市未曾到。生理自江湖。那知城市道。晴日七八船。熙熙在清川。但見笑相屬。不省歌何曲。忽然四散歸。遠處滄洲微。或云後車載。藏去無復在。至老不曲躬。羊裘行澤中。

蓮根有長絲

郭祥正

蓮根有長絲。不供貧女機。柳梢有飛綿。不暖寒者衣。朝歌悠悠暮歌短。下地沉沉上天遠。東生白日還西流。志士長懷萬古愁。

金山行

郭祥正

金山杳在滄溟中。雪崖冰柱浮仙宮。乾坤扶持自今古。日月髣髴躔西東。我泛靈槎出塵世。搜索異境窺神工。一朝登臨重太息。四時想像何其雄。卷簾夜閣掛北斗。大鯨駕浪吹長空。舟摧岸斷豈足數。往往霹靂鏑蛟龍。寒蟾八月蕩搖海。秋光上下磨青銅。鳥飛不盡暮天碧。漁歌忽斷蘆花風。蓬萊久聞未成往。壯觀絕致遙應同。潮生潮落夜還曉。物與數會誰能窮。百年形影浪自苦。便欲此地安微躬。白雲南來入我望。又起歸興隨征鴻。

驪山歌

李鷹

君門如天深九重。君王如帝坐法宮。人生難處是安穩。何爲來此驪山中。複道連雲接金闕。樓觀隱煙橫。翠紅林深谷暗迷。八駿朝東暮西勞。六龍西幸峨眉棧。悲風便入華清院。霓裳蕭散羽衣空。麋鹿來遊墟市變。我上朝元春半老。滿地落花人不掃。羯鼓樓高掛夕陽。長生殿古生青草。可憐吳楚兩醜鷄。築臺未就已堪悲。長楊五柞漢幸免。江都樓成隋自迷。由來流連多喪德。宴安鳩毒因奢惑。三風十愆古所戒。不必驪山可亡國。

築長堤

田畫

築長堤。白頭荷杵隨者妻。背脅偃僂筋力微。以手置胷路旁啼。老夫七十嫗與齊。五尺應門生兩兒。夜來春雨深一犁。破曉徑去耕南陂。南隣里正豪且強。白紙大字來呼追。科頭跣足不得稽。要與官長脩長堤。官長亦大賢。能得使者意。正堤駕軺軒。不復問餘事。終當升諸朝。自足富妻子。何惜桑榆年。一爲官長死。

叢臺歌

賀鑄

累土三百尺。流光二千年。人生物數不相待。摧頽故址秋風前。武靈舊壠今安在。禿樹無陰困樵采。玉簫金鏡未銷沉。幾見耕夫到城賣。君不聞叢臺全盛時。綺羅成市遊春輝。一從瑀輦閉荒草。蕭散行雲無復歸。招魂想像風流在。晴華露蔓猶依係。紆棘逕。撩人衣。禾黍晚成。麇貉肥。層簷壁瓦碎平地。夢作鴛鴦相伴飛。登臨弔古將語誰。城郭人民今是非。指君看取故時物。南有清流西翠微。彷徨華表不忍去。豈獨遼東丁令威。

五言古詩

誠兒姪八百字

范質

昨得謝課書。希於京秩之中。更與遷轉。余以諸兒姪輩。生長以來。未諳外事。艱難損益。懵然莫知。因抒古詩一章曉之。

去年初釋褐。一命列蓬丘。謂謝青袍春草色。白紵棄如仇。適會龍飛慶。玉澤天下流。爾得六品階。無乃太

為優。凡登進士第。四選昇校讎。歷官十五考。敍階與爾儔。如何志未滿。意欲陵雲遊。若言品位卑。寄書來

我求省之再三歎。不覺淚盈眸。吾家本寒素。門地寡公侯。先子有令德。樂道尚優游。生逢世多僻。委順信

沉浮。仕宦不喜達。吏隱同莊周。積善有餘慶。清白為貽謀。伊余奉家訓。孜孜務進修。夙夜事勤肅。言行思

悔尤。出門擇交友。防慎畏薰蕕。省躬常懼玷。恐掇庭闈羞。童年志于學。不墮為箕裘。二十中甲科。頽尾化

為虬。二十三進士及第今舉全數三十入翰苑。時三步武向瀛州。四十登宰輔。年四貂冠侍冕旒。備位行一紀。將何助

帝猷。既非救旱雨。豈是濟川舟。天子未遐棄。日益素飡憂。黃河潤九里。草木皆寢漬。吾宗凡九人。繼踵昇

官次。門內無白丁。森森朱綠紫。鷓行泊內職。亞尹州從事。府掾監省官。高低皆清美。悉由僥倖昇。不因資

考至。朝廷懸爵秩。命之曰公器。才者祿及身。功者賞於世。非才及非功。安得專厚利。寒衣內府帛。飢食太

倉米。不蠶復不穡。未嘗勤四體。雖然一家榮。豈寒衆人議。顯顯十日窺。齷齪千人指。曾參云十日所視古

畏借問爾與吾。如何不自媿。戒爾學立身。莫若先孝悌。怡怡奉親長。不敢生驕易。戰戰復兢兢。造次必於

是。戒爾學干祿。莫若勤道藝。嘗聞諸格言。學而優則仕。不患人不知。惟患學不至。戒爾遠恥辱。恭則近乎

禮自卑而尊人。先彼而後己。相鼠與茅鴟。宜鑑詩人刺。毛詩相鼠刺無禮左傳茅鴟刺不恭戒爾勿放曠。放曠非端士。周孔

垂名教。齊梁尙清議。南朝稱八達。千載穢青史。戒爾勿嗜酒。狂藥非佳味。能移謹厚性。化爲兇險類。古今

傾敗者。歷歷皆可記。戒爾勿多言。多言者衆忌。苟不慎樞機。災危從此始。是非毀譽閒。適足爲身累。舉世

重交游。擬結金蘭契。忿怨容易生。風波當時起。所以君子心。汪汪淡如水。舉世好承奉。昂昂增意氣。不知

承奉者。以爾爲翫戲。所以古人疾。籛除與戚施。舉世重任俠。史記輕死重義曰俠呼俗爲氣義。爲人赴急難。往往陷

刑死。所以馬援書。殷勤戒諸子。馬援告兒孫書甚非此事舉世賤清素。奉身好華侈。肥馬衣輕裘。揚揚過閭里。雖得市

童伶。還爲識者鄙。我本羈旅臣。遭逢堯舜理。位重才不充。戚戚懷憂畏。深淵與薄冰。蹈之惟恐墜。爾曹當

憫我。勿使增罪戾。閉門斂蹤跡。縮首避名勢。名勢不久居。畢竟何足恃。物盛必有衰。有隆還有替。速成不

堅牢。亟走多顛躓。灼灼園中花。早發還先委。遲遲澗畔松。鬱鬱含晚翠。賦命有疾徐。青雲難力致。寄語謝

諸郎。躁進徒爲耳。

懷賢詩

王禹偁

僕直東觀時。閱五代史。見近朝名賢。立功立事者。簞慕不已。思欲形于歌詠而未遑。今待罪上雒。不與郡政。專以吟諷爲事業。因賦懷賢詩三首。仍以官氏列于篇首云。

桑魏公維翰

魏公王佐才。獨力造晉室。揮手廓氛霾。放出扶桑日。感慨會風雲。周旋居密勿。下民得具瞻。上帝賚良弼。沉沉帷幄謀。落落政事筆。品流遂甄別。法令頗齊一。跋勅朝據案。論兵夜造膝。多士若鶩鴻。官材咸有秩。

諸侯如狼虎。請謁盡股栗。秉鈞多事朝。綽綽有紀律。遠將留侯比。近以贊皇匹。志在混車書。誓將闡儒術。皇天未厭亂。運去何飈歘。高祖狀寰區。少帝無始卒。老成既疏遠。羣小相親暱。瀆武兵漸驕。倒懸人不恤。和親絕強虜。謀帥用悍卒。魏公在藩垣。上疏論得失。七事若丹青。辭切痛入骨。忠言殊不省。直道果見屈。鐵馬從北來。煙塵晝蓬勃。穹廬易市朝。左衽雜纓紱。主辱臣不死。囚縛自安逸。唯公獨遇害。身殞名不沒。惜乎英偉才。濟世功未畢。一讀晉朝史。遺恨空鬱鬱。子孫亦不振。天道難致詰。

李兵部濤

有唐張曲江。盛名何嶂擘。請誅安祿山。先覺不見納。胡鷓有反相。其事遠相接。賢人何代無。舊史聊可獵。兵部事晉朝。文學中科甲。強臣方跋扈。朝士多恇怯。獨持尙方劍。願斬犇鯨鯨。堂堂張彥澤。反勢凌閭闔。拜章請顯戮。直氣不可壓。三進叩玉墀。植笏立莫莢。皇情彌慰撫。清問屢應答。終焉念小恩。曾不顧大業。高吟歸去詩。潺湲淚承睫。旋踵卽亂華。有同虞不臘。張公領鐵馬。朝市胡塵合。刺謁甚閑詳。辭氣殊不懼。虎狼不敢害。加禮爲下榻。當年棄饗謬。異代居調燮。相位席不煖。帝澤安可洽。斯人旣淪亡。此風亦蕭颯。滑稽何足累。大節世已乏。安用學腐儒。矻矻守禮法。

王樞密朴

西樞經緯才。慷慨遇真主。文學中甲科。風雲參霸府。直躬在密勿。未始畏強禦。凭案讀古書。箕踞視太祖。澤欲浸生民。化將還邃古。拆寺遇武宗。排佛如韓愈。盡髮郡苾芻。使之藝禾黍。兵威遂強盛。人力不耗蠹。世宗征淮甸。委任當留務。馬前拜侯伯。塔下列榘斧。叱咤氣生風。將校汗如雨。手築太平基。胼胝不輟杵。

具瞻人有望。衰運時不與。脩短天難忱。殲奪民何怙。恩深與小斂。撫卹甚悲沮。云亡復殄瘁。前哲非虛語。世豈乏賢良。材難具文武。曆象過羲和。文章敵燕許。可能隨衆人。冥寞歸塵土。子孫雖衆多。必復事未覩。誰銘遷客詩。高揭王公墓。

五哀詩

王禹偁

予讀杜工部八哀詩。唯鄭廣文。蘇司業。名位僅不顯者。餘多將相大臣。立功垂裕。無所哀矣。噫。子美之詩。蓋取人之云亡。邦國殄瘁而已。非哀乎時也。有未列於此者。待同志而嗣之云。

故尙書兵部侍郎琅邪王公祐

琅邪名父子。少孤起徒步。贊謁桑魏公。藻鑑非易與。撫頂久歎惜。王楊許爲伍。諸侯取爲官。佐幕大名府。主帥杜重威。功大心跋扈。天驥被縶維。神龜罹網罟。六師薄孤壘。三面開生路。主人旣釋放。賓筵因註誤。逼脅本非辜。貶謫尋不赴。折腰紆墨綬。揚翼久未舉。梁竦恥州縣。長卿有辭賦。囊行旌邑政。柱史登朝序。抨彈志不樂。潤色身有素。錦窠應列宿。星垣吟藥樹。丹青生帝典。金玉鏗王度。東觀秉直筆。南宮司貢部。時英萃門下。藹藹騰嘉譽。鵬掀六月風。豹蔚七日霧。多才同列忌。嫉惡姦人怒。排斥屢專城。織羅仍典午。名官頗流離。衣食常貧窶。文明起代邸。振拔非不遇。紫微雖正拜。白髮已遲暮。史魚直有遺。棖也剛不吐。非才占清列。志欲投兕虎。英俊在草萊。力能生翅羽。毀譽兩無私。華袞閒蕭斧。掌選循故實。尹京恥鈞鉅。名位僅三事。疾瘵嬰二豎。告滿拜貳卿。君恩慰沉痾。終見哲人萎。蕭蕭空壠墓。鯉庭有令嗣。鳳閣登仙署。兩制列門生。九原應自許。蒼蒼猶足信。吾道似有訴。餘慶在子孫。明明深可據。

故尙書虞部員外郎知制誥貶萊州司馬渤海高公錕

文自咸通後。流散不復雅。因仍歷五代。秉筆多艷冶。高公在紫微。濫觴誘學者。自此遂彬彬。不蕩亦不野。惜哉傷躁進。忤旨出閣下。吾君登大寶。兌澤連滂灑。均陽又淮陽。移徙曾不暇。遂無牽復命。虛偶文明化。何路得自新。齋志入長夜。人謂責太深。終于郡司馬。

故殿中侍御史滎陽鄭公起

柱史有名跡。清才自天縱。運思慶雲合。落筆醴泉湧。歌詩與文賦。錚錚人口諷。揚袂入澤宮。鵠心一箭中。恃才善戲謔。負氣好侮弄。大志有誰知。細行乖自訟。小諫事世宗。惕惕佩光寵。太祖方歷試。握兵權已重。上書范魯公。先見不能用。歷數不在周。諷謠卒歸宋。汗漫失屠龍。接輿遂歌鳳。行荷伯倫鍤。高臥畢卓甕。神德不爲嫌。優待臺憲俸。晚求萬泉令。吏隱官資冗。一旦隨朝露。識者彌哀痛。無子副家聲。身世若一夢。文編多散失。人口時傳誦。空持一器酒。何處澆孤家。

故國子博士郭公忠恕

汾陽飽經術。賦性甚坦率。在昔舉神童。廣陽推傑出。尙書誦在口。何論落自筆。公應舉時口念尙書手寫論語總角取科名。弱冠紆纓絨。早佐襄陰幕。漢鼎入周室。失志罷屠龍。伴狂遂捫虱。周行亦僂俛。吏隱多放逸。滑稽東方朔。圖畫王摩詰。古文識蝌蚪。奧學辯萍實。字窮蒼頡本。篆證陽冰失。王績醉爲卿。伯倫居無匹。俸錢乏一囊。官路從三黜。朱衣多不著。白髮仍慵櫛。漸老羈旅年。方見昇平日。忽以伎術召。此意殊鬱鬱。放口忤無鬚。何門求造膝。遁逃終見捕。譴逐道中卒。遺孤落閭閻。荒塚鳴蟋蟀。手澤漸難求。誰家耀箱帙。投吊焚此

詩九原應有物。

故太子中允知洛陽縣事頴公贊

洛陽富文彩。峭拔四子流。提筆入廣場。辭氣干斗牛。擢第在芸閣。言事觸冕旒。左降幸百里。道勝心無憂。才高恥吏役。放蕩不檢脩。起應賢良科。下筆不見休。青官尙淹恤。赤縣且優游。轉才糞土賤。高義雲天浮。懸磬任貧窶。盈樽長獻酬。知己彼何人。鳳閣與鼈頭。推挽終不起。壯志將焉收。晚年圯橋役。關市良可羞。忽焉爲異物。寒草封一丘。媼嫠應凍餓。交友誰尋求。遺孫方稚齒。爽秀已逾邁。皇天若有憑。必使光貽謀。

橄欖

王禹偁

江東多果實。橄欖稱珍奇。北人將就酒。食之先顰眉。皮核苦且澁。歷口復棄遺。良久有回味。始覺甘如飴。我今何所喻。喻彼忠臣辭。直道逆君耳。斥退投天涯。世亂思其言。噬臍焉能追。寄語采詩者。無轉橄欖詞。

勸學篇

張詠

大化不自言。委之在英才。玄門非有閉。苦學當自開。世上百代名。莫遣寒如灰。晨雞固自勉。男子胡爲哉。胷中一片地。無使容纖埃。海鷗尙可狎。人世何嫌猜。勤慎君子職。顏閔如瓊瑰。刻薄小人事。斯輩直可哀。放蕩功不遂。蒲盈身亦灾。將心須內疚。禍福本無媒。

悼蜀詩四十韻

張詠

至道紀號元。祀春正月。爲審官院考績引對。天子曰。天厭西蜀。歲荐飢饉。任失其人。枉政殘剝。民興惡作孽。授命虎旅。殄滅兇逆。矧彼黔首。不聊其生。觀人安民。朕意罔怠。寬則育姦。猛則殘俗。得夫濟者。實難其

人爾惟方直。歷政有績。邛夔幽遐。往理其俗。克畏克愛。汝其欽哉。祇奉命。乘輅西征。夏四月二十有八日。供厥職。噫。謀術庸陋。罔敢怠忽。豪猾抑之。賦斂乃息。存恤窮困。招綏流亡。杜厥剝削。宣揚皇風。間一歲而民弗克安。非郡縣之罪。偏將之罪也。有聽者。孰不知民心。上畏王師之剽掠。下畏草孽之強暴乎。良家困弊。漸復從賊。庶賒其死。深可忿也。天子遠九重。孤賤者。憚權豪而不敢言。嗚呼。雖采詩之官。闕之久矣。然歌詠諷刺。亦不可寂然。詠敢作悼蜀古詩四十韻。書于視政之廳。有識君子。幸勿以狂瞽爲罪。

蜀國富且庶。風俗矜浮薄。奢僭極珠貝。狂佚務娛樂。虹橋吐飛泉。煙柳閉朱閣。燭影逐星沉。歌聲和月落。鬪雞破百萬。呼盧縱大噓。遊女白玉璫。驕馬黃金絡。酒肆夜不扃。花市春慚作。禾稼暮雲連。紈繡淑氣錯。熙熙三十年。光景倏如昨。天道本害盈。侈極禍必作。當時市政者。罔思救民瘼。不能宣淳化。移風復儉約。情性非方直。多爲聲色著。從欲竊虛譽。隨俗縱貪攫。蠶食生靈肌。作威恣暴虐。佞罔天子聽。所利唯剝削。一方忿恨興。千里攘臂躍。火氣烘寒空。雪彩揮蓮萼。無人能却敵。何假施擊柝。害物黷貨輩。皆爲白刃爍。瓦礫積臺榭。荆棘迷城郭。里第鎖苔蕪。庭軒喧燕雀。斗粟金帛市。束芻羅綺博。悲夫驕奢民。不能飽葵藿。朝廷僉元戎。帥師蕩兇惡。虎旅一以至。梟巢一何弱。燎毛焰晶熒。破竹鋒熠爚。兵驕不可戢。殺人如戲謔。悼耄皆麗誅。玉石何所度。未能剪強暴。爭先謀剽掠。良民生計空。賒死心殞穫。四野起豺狼。五畝孰耕鑿。出師不以律。餘孽何由却。俾夫熾蜂蠹。寡術能籠絡。邊陲未肅清。胡顏食天爵。世方尙奔競。誰復振審諤。黃屋遠萬里。九重高寥廓。時稱多英雄。才豈無衛霍。近聞命良臣。拭目觀奇略。

赴郡之初尋屬愆宥有司舉舊典取湫水徵巫覡以致禱而涉旬靡應農事方急遣罷去越翊日漸

獲優洽

劉筠

優詔將州任視政纔旬時田峻訴炎曠坐虞多稼萎雲將掉頭去波臣涸轍危行部殊未及隨車杳難期

往慙神父化

鮑德守南陽時多荒災唯此郡豐穰吏民愛悅號爲神父

今取早母嗤

蕭雅所臨必赤地大旱人號爲早母諸曹白事者雩典舉舊規郡北

岐棘山上有三湫池衙吏絜齊往汲水置縹盜朝服領巫覡詰旦迓諸岐承以結綵輿奉於五龍祠自是

率賓介寅午款于斯紛敷薦楮鏹浸漬灑楊枝瓦鑪松香鈍瓢樽黍酌醴四壁繪神變正筵塑靈儀怖若

葉公牖怪甚葛仙陂老覲十數輩勃頭如魑童巫及伶倡貌寢語嘍囁但多齷齪質曾乏婉變姿交手

操鈴拂合譟屢傲傲喧塵著蓬髮穢汗落粉頤一聞且一嘔掩鼻以攢眉隋蔚朝待族敗革震散之巽飄

暮欲息竅竹呼復來慢黷固已甚誕妄相馮隨如是者浹日僅得沾服滋嗟予政無狀百拜胡敢辭矧夫

民習俗姑用慰齋咨抑聞古人言天鑒實無私神道貴得一何乃託邪師遽俾送湫勺撤役勤繭絲申明

恤刑詔挺重捨輕疑從此四三日油濡洽封圻又聞堯湯世水旱軫君慈存救自有術斂散適所宜元元

無菜色九載尙熙熙周禮地官職皇舞雖有祈道經蒞天下傷民誠弗爲惟神稟聰正遠鬼務肅祇願守

有常德可戒興妖思

寄岳陽劉從事

韓不

秋來憶故人寓目臨大野遠近聞清商依稀奏豳雅經霜樹半紅無風葉自下一片洞庭心聊憑塞鴻寫

溫泉詩

錢易

悲哉天寶時帝耄政不修寵幸尊婦人陰極陽已柔外戚盛本枝櫛比封列侯丞相大將軍備位甚悠悠

天下安既久。積漸力不周。車服金玉煥。黎庶飢寒愁。驪山溫泉宮。晝幸與夜游。一游百司備。萬費一日休。雖能心自快。化作社稷憂。國忠恣吞噬。林甫懷姦偷。胡雛據太原。鍾鼓無計收。黃塵滿長安。慘黷九廟羞。唐天未使絕。返正知疾瘳。自茲遊賞地。荆棘生荒秋。舊物悉已廢。蜘蛛挂重樓。覽者咸寒心。一過三迴頭。因知帝王業。堅固宜鴻猷。豈可信嗜欲。悔弄生瘡疣。雕墻峻宇。誠簡牘。况有由。鬪思黍離章。續之應可仇。

夏日山居詩

種放

陰陰林木靜。寂寂無人境。紅綻紫葳香。嵐沈玉膏冷。看雲時獨坐。慎事常中省。何客馭風來。新篔動疎影。

諭蒙詩

種放

大盈卑百瀆。自成浮天溷。崇丘下累塊。竟爲蔽日深。王者在謙小。夙惟堯禹心。拜言尊賢仁。慎德棄珠金。自滿九族散。匪驕百善尋。炳茲夏商鑒。滅國因夸淫。

宋文鑑卷第十五

五言古詩

新居感詠

幽居卽事

和王校勘中夏東園

列子有力命王充論衡有命祿覽之有感

贈劉潛歸陶丘

鄱陽酬泉州曹使君見寄

四民詩

畫錦堂

歲晏出沐感事內訟

秋日白鷺亭向夕風晦有作

水谷夜行寄子美聖俞

讀徂徠集

重讀徂徠集

宋文鑑 卷第十五

杜衍

杜衍

晏殊

晏殊

石延年

范仲淹

范仲淹

韓琦

宋庠

王琪

歐陽脩

歐陽脩

歐陽脩

獲麟贈姚闢先輩

歐陽脩

喜雨

歐陽脩

飛蓋橋翫月

歐陽脩

奉答子華學士安撫江南見寄之作

歐陽脩

感興二首

歐陽脩

讀書

歐陽脩

感事

歐陽脩

董永

葉清臣

憫農

葉清臣

縣齋對雪

梅堯臣

秋思

梅堯臣

郭之美忽過云往河北謁歐陽永叔沈子山

梅堯臣

送王判官之江陰軍幙

梅堯臣

范饒州坐中客語食河豚魚

梅堯臣

送薛氏婦歸絳州

梅堯臣

川上田家

梅堯臣

送王介甫知毗陵

梅堯臣

新居感詠

杜衍

無似老且病。唯恐歸田遲。一旦得引年。九天還聽卑。尙霑二品祿。俾盡百年期。恩深淪骨髓。感極橫涕洟。始營菟裘地。來向灘水湄。城隅最窮僻。匠者寧求奇。卜築悉由己。軒牖亦隨宜。外以庇風雨。內以安妻兒。鶯雀莫羣噪。鷦鷯才一枝。因念古聖賢。名爲千古垂。何嘗廣居室。儉爲後人師。亞聖樂簞食。寢丘無立錐。文終防勢奪。景桓恥家爲。文園四壁立。鄭公小殿移。伊余具員者。適會承平時。無術毗萬務。無才撫四夷。爲郡亦齷齪。勞心徒孜孜。保身已天幸。拊己宜自知。開卷顏閒厚。復懼來者嗤。勗哉知止足。清白猶可追。

幽居卽事

杜衍

寂寂復寂寂。告老閑居日。徑草高於人。林鳥熟如客。黃卷不釋手。清風常滿室。內顧平生心。無過此時適。

和王校勘中夏東園

晏殊

東園何所樂。所樂非塵事。野竹亂無行。幽花晚多思。閑窺魚尾赤。暗辨蜂腰細。樹影密遮林。藤梢狂冒袂。潘蔬足登膳。陶秫徑取醉。幸獲我汝交。都忘今昔世。歡言捧瑤佩。願以疎麻繼。

列子有力命。王充論衡有命祿。極言必定之致。覽之有感。

晏殊

大鈞播羣物。零茂歸自然。默定既有初。不爲智力遷。禦寇導其流。仲任派其源。智愚信自我。通塞當由天。宰世白臯伊。迷邦有顏原。吾道誠一槩。彼途鍾百端。卷之入纖毫。舒之盈八埏。進退得其宜。夸榮非所先。朝聞可夕隕。吾奉聖師言。

贈劉潛歸陶丘

石延年

丈夫未大用。身與仁義閑。可宜更聚散。風塵摧其顏。君今歸柯澤。路出梁宋間。梁宋有吾廬。親老待我還。矧復君先歸。因君頭應班。春老有時回。人老不再少。草自有時榮。髮白不再好。人生不如春。髮生不如草。可堪送別春。草前青春未。老人先老。

鄱陽酬泉州曹使君見寄

范仲淹

吾生豈不幸。所稟多剛腸。身甘一枝巢。心苦千仞翔。志意苟天命。富貴非我望。立譚萬乘前。肝竭喉無漿。意君成大舜。千古聞羶香。寸懷如春風。思與天下芳。片玉棄且在。雙足何辭傷。王章死於漢。韓愈逐諸唐。獄中與嶺外。妻子不得將。義士撫卷起。眦血一露裳。胡弗學揭厲。胡弗隨低昂。于時宴安人。滅然已不揚。匹夫虎敢鬪。女子熊能當。況彼二長者。烏肯巧如簧。我愛古人節。皎皎明於霜。今日貶江徼。多慙韓與王。罪大禍不稱。所損傷纖芒。盡室來官下。君恩大難忘。酒聖無隱量。詩豪有餘章。秋來魏公亭。金菊何煌煌。登高發秘思。聊以據吾狂。卓有梅聖俞。作邑郡之旁。矯首賦靈烏。擬彼歌滄浪。因成答爲戲。移以贈名郎。泉南曹史君。詩源萬里長。復我百餘言。疑登孔子堂。聞之金石音。純純自宮商。念此孤鳴鶴。聲應來遠方。相期養心氣。彌天浩無疆。鋪之被萬物。照之諧三光。此道果迂闊。陶潛吾醉鄉。

四民詩

范仲淹

前王詔多士。咸以德爲先。道從仁義廣。名由忠孝全。美祿報爾功。好爵糜爾賢。黜陟金鑑下。昭昭熒與妍。此道日以疎。善惡何茫然。君子不斥怨。歸諸命與天。術者乘其隙。異端千萬惑。天道入指掌。神心出胷臆。

聽幽不聽明。言命不言德。學者忽其本。仕者浮於職。節義爲虛言。功名思苟得。天下無所勸。賞罰幾乎息。陰陽有變化。其神固不測。禍福有倚伏。循環亦無極。前聖不敢言。小人爾能億。裨竈方激揚。孔子甘寂默。六經無光輝。反如日月蝕。大道豈復興。此弊何時抑。末路競馳騁。澆風揚羽翼。昔多松柏心。今皆桃李色。願言造物者。廻此天地力。

聖人作耒耜。蒼蒼民乃粒。國俗儉且淳。人足而家給。九載襄陵禍。此戶獨安輯。何人變清風。驕奢日相襲。制度非唐虞。賦斂由呼吸。傷哉桑穀人。常悲大弦急。一夫耕幾壟。游墮如雲集。一蠶吐幾絲。羅綺如山入。太平不自存。凶荒亦何及。神農與后稷。有靈應爲泣。

先王教百工。作爲天下器。周且意不朽。刊之考工記。嗟嗟遠聖人。制度日以紛。窈窕阿房宮。萬態橫青雲。焚煌甲乙帳。一朝那肯焚。秦漢驕心起。陳隋益其侈。鼓舞天下風。滔滔弗能止。可堪佛老徒。不取慈儉書。竭我百家產。崇爾一室居。四海競如此。金碧照萬里。茅茨帝者榮。今爲庶人恥。宜哉老成言。欲擺般輸指。嘗聞商者云。轉貨賴斯民。遠近日中合。有無天下均。上以利吾國。下以藩吾身。周官有常籍。豈云逐末人。天意亦何事。狼虎生貪秦。經界變阡陌。吾商苦悲辛。四民無常籍。茫茫僞與真。游者竊吾利。墮者亂吾倫。淳源一以蕩。頽波浩無津。可堪貴與富。侈態日日新。萬里奉綺羅。九陌資埃塵。窮山無遺寶。竭海無遺珍。鬼神爲之勞。天地爲之貧。此弊已千載。千載猶因循。桑柘不成林。荆棘有餘春。吾商則何罪。君子恥爲鄰。上有堯舜主。下有周召臣。琴瑟願更張。使我歌良辰。何日用斯言。皇天豈不仁。

古人之富貴歸於本郡縣。譬若衣錦游。白晝自光綯。不則如夜行。雖麗胡由見。事累載方冊。今復著俚諺。或紆太守章。或擁使者傳。歌樵忘故窮。滌器掩前賤。所得快恩仇。愛惡任驕狷。其志止于此。士固不足羨。茲予來舊邦。意弗在矜銜。以疾而量力。懼莫稱方面。抗表納金節。假守翼鄉便。帝曰其汝俞。建纛往臨殿。行路不云非。觀歎溢郊甸。病軀諸少休。先隴遂完繕。歲時存父老。伏臘潔親薦。恩榮孰與偕。衰劣愧獨擅。公餘新此堂。夫豈事飲燕。亦非張美名。輕薄詫紳弁。重祿許安閑。顧已常兢戰。庶一視題榜。則念報主眷。汝報能何爲。進道確無倦。忠義聳大節。匪石烏可轉。雖前有鼎鑊。死耳誓不變。丹誠難悉陳。感泣對筆硯。

歲晏出沐感事內訟

宋庠

山海有完士。希世爲良籌。偶穿東郭履。遂別野人舟。不恥篆刻賦。來肩英俊游。私智甚鳧短。塵容若鷗愁。備員太史氏。補屬富民侯。姑學了官事。何嘗分主憂。日貪斗食利。歲感星躔周。中都富才彥。方駕若龍虬。茂先善史漢。平津治春秋。高文用司馬。格五寵吾丘。閒闊路逢葛。繽紛人召鄒。桑羊興賈豎。安國出繆囚。汲鄭貴交盛。徐陳英藻遒。況乃天下樞。雄雌來九州。衣冠經複道。鼓吹出長楸。席上萬錢箸。橋邊八列騶。雍容絳魯袂。意氣拂吳鉤。咨余良不隄。瓴甃廁琳瑯。吹竽昔已濫。在梁今可尤。臺閣魏舒被。風霜蘇季裘。有志謝軒鶴。無機防海鷗。恭埃杜陵課。誅茅歸故疇。

秋日白鷺亭向夕風晦有作

王琪

白鷺敞西軒。棟宇窮爽塏。千峯若聯環。翠色不可解。是時天宇曠。六幕無纖靄。金斗熨秋江。素練橫衣帶。乾坤清且斂。氣象朝昏改。蘆花作雪風。飛舞來滄海。九宵汀鶴起。萬里檣鳥快。月上三山頭。烏沒橫塘外。

滄茫洲渚寒。銀錯星斗大。開樽屏絲竹。披襟向簫籟。余生本江湖。偃蹇欣所會。清興雖自發。苦嗜亦吾累。魚龍憑夜濤。四面忽滂湃。安得犀燈然。煌煌發水怪。

水谷夜行寄子美聖俞

歐陽脩

寒鷄號荒林。山壁月倒掛。披衣起視夜。攬轡念行邁。我來夏云初。素節今已屆。高河瀉長空。勢落九州外。微風動涼襟。曉氣清餘曖。緬懷京師友。文酒邈高會。其間蘇與梅。二子可畏愛。篇章富縱橫。聲價相磨蓋。子美氣尤雄。萬竅號一噫。有時肆顛狂。醉墨洒滂霈。譬如千里馬。已發不可殺。盈前盡珠璣。一一難東汰。梅公事清切。石齒漱寒瀨。作詩三十年。視我猶後輩。文詞愈清新。心意難老大。譬如妖韶女。老自有餘態。近詩尤古硬。咀嚼苦難嘍。初如食橄欖。真味久愈在。蘇豪以氣轢。舉世徒驚駭。梅窮獨我知。古貨今難賣。二子雙鳳凰。百鳥之嘉瑞。雲煙一翱翔。羽翮一摧鍛。安得相從游。終日鳴嘍嘍。問胡苦思之。對酒把新蟹。

讀徂徠集

歐陽脩

徂徠魯東山。石子居山阿。魯人之所瞻。子與山嵯峨。今子其死矣。東山復誰過。精魄已埋沒。文章豈能磨。壽命雖不長。所得固已多。舊藁偶自錄。滄溟之一蠹。其餘誰付與。散失存幾何。存之警後世。若鑑照妖魔。子生誠多難。憂患靡不罹。音羅官學三十年。六經老研摩。問胡所專心。仁義丘與軻。揚雄韓愈氏。此外豈知他。尤勇攻佛老。奮筆如揮戈。不量敵衆寡。膽大身么麼。往年遭母喪。泣血走岷峨。垢面跣雙足。鋤犁事田坡。至今鄉里化。孝悌勤蠶禾。昨者來太學。青衫踏朝靴。陳詩頌聖德。厥聲續猗那。羔鴈聘黃晞。晞驚走鄰家。施爲可怪駭。世俗安委蛇。謗口由此起。中之若飛梭。上賴天子明。不挂網者羅。憶在太學年。大雪如翻

波生徒日盈門。飢坐列鴈鵝。絃誦聒鄰里。唐虞廣詠歌。常續最高第。騫游各名科。豈止學者師。謂宜國之
幡。天壽反仁鄙。誰尸此偏頗。不知諷諷者。又忍加詆訶。聖賢要久遠。毀譽暫誼譁。生爲舉世疾。死也魯人
嗟。作詩遺魯社。祠子以爲歌。

重讀徂徠集

歐陽脩

我欲哭石子。夜開徂徠編。開編未及讀。涕泗已漣漣。勉盡三四章。收淚輒忻懽。切切善惡戒。丁寧仁義言。
如聞子談論。疑子立我前。乃知長在世。誰謂已沉泉。昔也人事乖。相從常苦難。今而每思子。開卷子。在顏。
我欲貴子文。刻以金玉聯。金可燦而銷。玉可碎非堅。不若書以紙。六經皆紙傳。但當書百本。傳百以爲千。
或落於四夷。或藏在深山。待彼謗焰熄。放此光芒懸。人生一世中。長短無百年。無窮在其後。萬世在其先。
得長多幾何。得短未足憐。惟彼不可朽。名聲文行然。讒誣不須辨。亦止百年間。百年後來者。憎愛不相緣。
公議然後出。自然見媿妍。孔孟困一生。毀逐遭百端。後世苟不公。至今無聖賢。所以忠義士。恃此死不難。
當子病方革。謗辭正騰喧。衆人皆欲殺。聖主獨保全。已埋猶不信。僅免斲其棺。此事古未有。每思輒長嘆。
我欲犯衆怒。爲子記此冤。下紓冥冥忿。仰叫昭昭天。書於蒼翠石。立彼崔嵬巔。詢求子世家。恨子兒女頑。
經歲不見報。有辭未能銓。忽開子遺文。使我心已寬。子道自能久。吾言豈須鐫。

獲麟贈姚關先輩

歐陽脩

世已無孔子。獲麟意誰知。我嘗爲之說。聞者未免非。而子獨曰然。有如墳應鏡。惟麟不爲瑞。其意乃可推。
春秋二百年。文約義甚夷。一從聖人沒。學者自爲師。崢嶸衆家說。平地生嶮巖。相訟益迂怪。各鬪出新奇。

爾來千餘歲。舉世不知迷。焯哉聖人經。照曜萬世疑。自從蒙衆說。日日遭蔽虧。常患無氣力。掃除浮雲披。還其自然光。萬物皆見之。子昔已好古。此經手常持。超然出衆見。不爲俗牽卑。近又脫賦格。飛黃擺銜羈。聖門開大道。夷路肆騰嬉。便可勦衆說。旁通塞多岐。正途趨簡易。慎勿事嶮崎。著述須待老。積勤宜少時。苟思垂後世。大禹尙胼胝。顧我今老矣。兩瞳蝕昏眵。大書難久視。心在力已衰。因思少自棄。今縱悔可追。戒我以勉子。臨文但吁嘻。

喜雨

歐陽脩

大雨雖霽霈。隔轍分晴陰。小雨散浸淫。爲潤廣且深。浸淫苟不止。利澤何窮已。無言雨大小。小雨農尤喜。宿麥已登實。新禾未抽秧。及時一日雨。終歲飽豐穰。夜響流靈霖。晨暉霽蒼涼。川源淨如洗。草木自生光。童稚喜瓜芋。耕夫望陂塘。誰云田家苦。此樂殊未央。

飛蓋橋翫月

歐陽脩

天形積輕清。水德本虛靜。雲收風波止。始見天水性。澄光與粹容。上下相涵映。乃於其兩間。皎皎掛寒鏡。餘暉所照耀。萬物皆鮮瑩。矧夫人之靈。豈不醒視聽。而我於此時。翛然發孤詠。紛昏忻洗滌。俯仰恣涵泳。人心曠而閑。月色高愈迥。惟恐清夜闌。時時瞻斗柄。

奉答子華學士安撫江南見寄之作

歐陽脩

百姓病已久。一言難遽陳。良醫將治之。必究病所因。天下久無事。人情貴因循。優游以爲高。寬縱以爲仁。今日廢其小。皆謂不足論。明日壞其大。又云力難振。旁窺各陰拱。當職自逡巡。歲月寢墮頽。紀綱遂紛紜。

坦坦萬里疆。蚩蚩九州民。昔而安且富。今也迫以貧。疾小不加理。浸淫將徧身。湯劑乃常藥。未能去深根。鍼艾有奇功。暫痛勿呻吟。痛定支體胖。乃知鍼艾神。猛寬相濟理。古語六經存。蠹弊革僥倖。濫官絕貪昏。牧羊而去狼。未爲不仁人。俊乂沈下位。惡去善乃伸。賢愚各得職。不治未之聞。此說乃其要。易知行每艱。遲疑與果決。利害反掌間。捨此欲有爲。吾知力徒煩。家至與戶到。飽饑而衣寒。三王所不能。豈特今所難。我昔忝諫列。日常趨紫宸。聖君堯舜心。閱閱極憂勤。子華當來時。玉音耳嘗親。上副明主意。下寬斯人屯。江南彼一方。巨細到可詢。論以上恩德。常冬反陽春。吾言乃其槩。豈止一方云。

感興二首

歐陽脩

懷祿不知慙。人雖不吾責。貧交重意氣。握手猶感激。煌煌腰間金。兩鬢颯已白。有生天地間。壽考非金石。古人報一飯。君子不苟德。憂來自悲歌。涕淚下沾臆。仕宦希寸祿。庶無饑寒迫。讀書爲文章。本以代耕織。學成頗自喜。祿厚愈多責。挾山以超海。事有非其力。君子貴量能。無輕食人食。

讀書

歐陽脩

吾生本寒儒。老尙把書卷。眼力雖已疲。心志殊未倦。正經首唐虞。僞說起秦漢。篇章與句讀。解詁及箋傳。是非自相攻。去取在勇斷。初如兩軍交。乘勝方酣戰。當其旗鼓催。不覺人馬汗。至哉天下樂。終日在几案。念昔始從師。力學希仕宦。豈敢取聲名。惟期脫貧賤。忘食日已晡。燃薪夜侵旦。謂言得志後。便可焚筆硯。少償辛苦時。惟事寢與飯。歲月不我留。一生今過半。中間嘗忝竊。內外職文翰。宦榮日清近。廩給亦豐羨。

人情慎所習。酖毒比安宴。漸追時俗流。稍稍學營辦。盃盤窮水陸。賓客羅俊彥。自從中年來。人事攻百箭。非惟職有憂。亦自老可歎。形骸苦衰病。心志亦退懦。前時可喜事。閉眼不欲見。惟尋舊讀書。篇簡多朽斷。古人重溫故。官事幸有間。乃知讀書勤。其樂固無限。少而干祿利。老用忘憂患。又知物貴久。至寶見百鍊。紛華暫時好。俯仰浮雲散。淡泊味愈長。始終殊不變。何時乞殘骸。萬一免罪譴。買書載舟歸。築室潁水岸。平生頗論述。銓次加點竄。庶幾垂後世。不默死芻豢。信哉蠹書魚。韓子語非訕。

感事

歐陽脩

空山一道士。辛苦學延齡。一旦隨物化。反言仙已成。開墳見空棺。謂已超青冥。尸解如蛇蟬。換骨蛻其形。既云須變化。何不任死生。

董永

葉清臣

董生少失母。老父鰥且貧。無田事耕稼。客作奉晨昏。朝推鹿車去。大樹爲庭藩。農家乏甘旨。糠粃苟自存。父死不得藏。鬻身奉九原。人道孝爲本。吠畝知所尊。傷嗟世教薄。至行豈足論。廩祿厚妻子。楸柎遺其親。靳吝一抔土。因循三尺墳。空令丘壑閒。凜凜慙英魂。

憫農

葉清臣

甲子孟冬。予隨牒之吳郡。汎舟丹陽。陽毗陵間。徐步野次。周視民田。其苗甚豐。而穀皆秕。問諸穫者。則曰。是春無雨。中夏始布。秋未及實。霜降而秕。奔訴諸縣。已更季旦。吏曰。農田之制。不是過也。子姑輸之。雖然。予卒歲不粒矣。聞之有感。故作是詩。

五月雨未沛。吾民耕固遲。中秋霜早至。我稼颯其萎。膏澤歎苦晚。凡苗惜遽衰。盈疇皆秕稗。辛歲誤京坻。國謝三年蓄。人悲一頃其。編齊陳牒訴。奔走失程期。縣籍拘彘制。官征有定規。勞歌不可繼。爲作憫農詩。

縣齋對雪

梅堯臣

密雪夜來積。起見萬物春。山川忽改色。草木一以新。古邑失荒穢。王路覆平均。從茲慶豐年。蹈詠慙小臣。

秋思

梅堯臣

梧桐在井上。蟋蟀在床下。物情有與無。節候不相假。寥寥風動葉。颯颯雨墮瓦。耳聽心自靜。誰是忘懷者。

郭之美忽過云往河北謁歐陽永叔沈子山

梅堯臣

春風無行迹。似與草木期。高低新萌芽。閉戶我未知。忽聞人扣門。手把蟠桃枝。問我此蟠桃。緣何結子遲。但笑不復答。問者當自推。振衣向河朔。河朔人偉奇。以茲不答意。遲子北歸時。

送王判官之江陰軍帳

梅堯臣

往時初渡江。頗愛江南美。誰知坐臥間。思極煙波裏。絮逐魮魚繁。鼓添蕤線紫。君行語風物。到日應相似。

范饒州坐中客語食河豚魚

梅堯臣

春洲生荻芽。春岸飛楊花。河豚當是時。貴不數魚蝦。其狀已可怪。其毒亦莫加。忿腹若封豕。怒目猶吳蛙。庖煎苟失所。入喉爲鏃鏑。若此喪軀體。何須資齒牙。持問南方人。黨護復矜誇。皆言美無度。誰謂死如麻。我語不能屈。自思空咄嗟。退之來潮陽。始憚餐龍蛇。子厚居柳州。而甘食蝦蟇。二物雖可憎。性命無舛差。斯味曾不比。中藏禍無涯。甚美惡亦稱。此言誠可嘉。

送薛氏婦歸絳州

梅堯臣

在家勗爾勤。女功無不喜。既嫁訓爾恭。恭己乃遠恥。我家本素風。百事無有侈。隨宜具奩箱。不陋復不鄙。當須記母言。夜寐仍夙起。慎勿窺窗戶。慎勿輒笑毀。妄非勿較競。醜語勿辨理。每順舅姑心。況逆舅姑耳。爲婦若此能。乃是儒家子。看爾十九年。門闥未嘗履。一朝陟大行。悲傷黃河水。車徒望何處。哭泣動隣里。生女不如男。天親反由彼。

川上田家

梅堯臣

斜光隔河明。入照桑柘下。臯壠生麥苗。青青尙堪把。遠見牛羊歸。相親童稚野。醉歌秋草閒。頗與世家寡。

送王介甫知毗陵詩

梅堯臣

吳牛常畏熱。吳田常畏枯。有樹不蔭犢。有水不溉稌。熟知事春農。但知急秋租。太守迫縣官。堂上怒奮鬚。縣官促里長。堂下鞭扑俱。不體天子仁。不恤黔首逋。借問彼爲政。一一何所殊。今君請郡去。預喜民將蘇。每觀二千石。結束辭國都。絲韉加錦緣。銀勒以金塗。兵吏擁後隊。劍撾盛前驅。君又不若此。革轡障泥烏。徐行問風俗。低意騎疲鴛。下情靡不達。略細舉其麤。曾肯爲衆異。亦罔爲世趨。學詩聞已熟。愛棠理豈無。

宋文鑑卷第十六

五言古詩

檢書

感興

哭尹師魯

秋懷

同持國宿太學官舍

牟駝岡閱馬

許希

東州逸黨

贈張績禹功

小孤山

雜詩效玉川體

雜詩二首

示張直溫

蘇舜欽

蘇舜欽

蘇舜欽

江休復

江休復

江休復

顏太初

顏太初

石介

劉敞

劉敞

劉敞

劉敞

朝乘

哀張子厚先生

今古路

漢文帝

戴不勝

司馬遷

揚雄

楊劉

日出堂上飲

我欲往滄海

少狂喜文章

今日非昨日

田漏

送潮州呂使者

雜詠

謝公泰安御名

劉敞

司馬光

司馬光

王安石

王安石

王安石

王安石

王安石

王安石

王安石

王安石

王安石

王安石

王安石

王安石

王安石

同昌叔賦鴈奴

王安石

寓言四首

王安石

遊土山示蔡天啓

王安石

夜夢與和甫別覺而有作

王安石

獨臥有懷

王安石

檢書

蘇舜欽

煩心思所持。屏事入小閣。躡撲下塵梁。侈哆張敗笈。雨爛百數番。蟲食三四夾。軒昂醉墨鬧。纖悉新書雜。魚子或破碎。蠶兒尙狎恰。快心伯長文。跋尾清臣榻。幼辭反知進。故句時自愜。墜亡多玩愛。存聚必勞帖。疎密交及戚。前後生與殪。誨束儼父師。寒暑布兒妾。謔浪突忽還。私匿情再接。愴事涕涔涔。憫時歎啜啜。一餉誠寂寞。千里遽會合。遊心到句涌。開眼見茗霽。京華歷歷復。節物忿忿涉。恍爾驚異方。遁去乃幾臘。回頭厭篋積。舉體覺疲薺。束閣聊欠伸。夢斷風一颯。

感興

蘇舜欽

後寢藏衣冠。前廟宅神主。吾聞諸禮經。此制出中古。秦嬴食先法。乃復祭於墓。漢衣以月遊。於道蓋無取。宣帝尊祖廟。失制徧九土。孝元酌前文。一旦悉除去。魏帝樂銅臺。遺令置歌舞。昏嗣竟從之。此事狂夫阻。唐制益紛華。諸陵鎖嬪御。曠女日哀吟。於先亦奚補。吾廟三聖人。乘雲不可覩。威靈已霄漢。嗣皇念宗祖。繪事移天光。刻象肖神武。徧勅舊遊地。輸材起宮宇。階城釵以金。牆壁衣之黼。功既卽奉迎。法仗疊簫鼓。

玩好擇珍奇。目奪不可數。三京佛老家。已有十數處。朝家雖奉先。越禮古不許。君不祭臣僕。父不祭支庶。丹楹豈非孝。聖貶甚蕭斧。大祀當以時。寢廟卽其所。惜哉恭儉德。乃爲侈所鹽。痛乎神聖姿。遂與夷爲侶。蒼生何其愚。瞻歎走旁午。賤子私自歎。傷時淚如雨。

哭尹師魯

蘇舜欽

前年子漸死。予哭大江頭。今年師魯死。予方旅長洲。初聞尙疑惑。涕淚已不收。舉盃欲向口。荆棘生咽喉。憶初定交時。後前穆與歐。君顏白如霜。君語清如流。予年又甚少。學古衆所羞。君欲舉拔萃。聲偶日抉搜。不鄙吾學異。推尊謂前脩。今踰二十年。迹遠心甚稠。後會國南門。夜談雪滿樓。青燈照素髮。酒闌氣益遒。昨君握兵柄。節制關外侯。予才入册府。俄作中都囚。飛章力辯雪。危言動前旒。時雖不見省。凜凜壓衆媮。旋聞君下獄。六月送渭州。渭州舊治所。昔擁萬貔貅。堂中坐玉帳。堂下森蛇矛。令嚴山石裂。恩煦春色浮。覈生無根牙。衆言起愆尤。返來入狴犴。吏對安可酬。法冠巧椎拍。刺骨不肯抽。削秩貶漢東。驅迫日置郵。窮塗無一簣。百口誰相調。諸子繼死亡。清血漬兩眸。貿然幾喪明。憤苦結不瘳。君性本剛峭。安可小屈柔。暴羅此冤辱。苟活何所求。人間不見容。不若地下遊。又疑天憎善。專與惡報讎。二豎潛膏肓。衆鬼來挪揄。棄局奔南陽。後事得所投。心膽尙卓犖。精明已彌留。生平經緯才。蕭瑟掩一丘。青天自茫茫。長夜何悠悠。萬物孰不死。死常在嚴秋。君齒方盛壯。衆期樹風猷。二邊況橫猾。四海皆瘡疣。斯時忽云亡。孰爲朝廷憂。予方編吳氓。日自親鋤耰。無緣匍匐救。兀兀空悲愁。時思莊生言。所樂唯蠲體。物理不可詰。此說誠最優。

秋懷

江休復

西風萬里至。曠然天地秋。暮雨生夕涼。百蟲鳴啾啾。楚山曉蒼蒼。楚水亦悠悠。騷人試登臨。感物增離憂。所思在遐方。欲往路阻脩。香草有蕙茝。嘉樹有梧楸。白露委芳馨。彫零使我愁。窮年倦羈窘。江湖思舊游。緜蘭製芰荷。飄泛一葉舟。肆情雲水間。意適何所求。

同持國宿太學官舍

江休復

翳翳雲月薄。冷冷雪風清。學省夜岑寂。天街斷人行。廣庭層閣陰。尋廊步餘明。松篠遞遙響。如聞絃誦聲。悠悠子佩詩。講坐塵埃生。迴就直舍休。齋齋談道精。心會境物融。泯然遺世營。寒眠屢展轉。寤言寫素誠。

車馳岡閱馬

江休復

牧馬散近坳。閱視乘高秋。馳岡似沙苑。堆阜帶川洲。坡陁故梁城。縈薄西南陬。連棚映林樾。星羅倚層丘。回風吹陣雲。奔騰欻來游。野性脫羈飲。屢齧遂所求。腹幹頗肥張。鬱怒何彪休。羣毆驟麋鹿。逸勢凌蛟虬。軍戎選輕捷。和鑾御調柔。毛物有千名。衆美歸驂騶。梁王愁思臺。佛刹居上頭。搗來一憑眺。遺墟莽悠悠。信陵骨已朽。巖穴誰見收。當時英豪輩。事逐東波流。置酒臨風軒。聊以紓煩憂。

許希

顏太初

鍼工許希。下蔡人。住梁門西市三十年。及天聖中。皇躬遺裕。有內戚達其姓名。上召見。三進鍼而疾平。面授尙藥奉御。其賜予不可勝紀。謝恩畢。西向而拜。上詢其故。奏曰。臣拜本師扁鵲也。上惜其用心不忘本。給錢五十萬爲立祠。封曰靈應侯。或曰。人生乎世。慎乎習。希失其習者也。使希不習醫而習儒。其遇主之日。不忘先師明矣。若然。則讀書爲儒。乘時取富貴。高冠長劍。昂昂廟堂之上。自負自得。不知素王之力者。

許希之罪人也。因爲詩云。

京城名利塗。車馬相奔馳。其間取富貴。往往輸巫醫。前後十數輩。身沒名已墜。獨有許希者。蘊蓄何瑰奇。始自下蔡來。所處尤喧卑。西市三十年。汨汨無人知。一朝仗至藝。驟登文石墀。三鍼愈上疾。神速不移時。酬以六尚官。著藉通端闈。旌以三品服。佩紫垂金龜。于時稱謝畢。西向復陳儀。當宁驚且問。歷歷宣其辭。臣傳扁鵲遇。主今得施。特此一展謝。臣心不自私。主上惜其意。擊賞爲嘘唏。仍給水衡錢。國西命立祠。復加靈應號。金額照華棧。自此輦轂下。求禱何祁祁。我過慶成坊。見之心且悲。秦醫術雖妙。五腑及四肢。所習得其人。千齡祀不虧。魯聖術至大。帝道與民彝。所習非其人。一朝反相持。小吏師荀況。竊爲辯說資。作相勸焚書。詐云愚蚩蚩。後之爲儒者。其心皆李斯。昔在布衣日。動守先王規。朝談十二經。夕誦三百詩。依憑稽古力。榮進無他岐。及居廟堂上。劍長冠義巍。自謂天所賦。焉知有宣尼。宣尼斷襲封。十經寒暑移。他姓爲邑官。鄉老皆驚疑。上章寢不報。九重遭面欺。諫官不舉失。御史不言非。盡爲許希笑。得路忘先師。

東州逸黨

顏太初

天之有常度。躔次絕乖離。地之有常理。沉潛無變虧。人之有常道。高下遵軌儀。三才各定位。萬古永不移。二儀設有變。修德可以祈。人道或反常。其亂何由支。昔在典午朝。國祚向陵夷。日向中夜出。赫赫來東陲。地向太極裂。中有蒼鵝飛。高厚災且異。人妖亦繁滋。始有竹林民。怪誕名不羈。次有夷甫輩。高談慕無爲。沉湎多越禮。阮籍兼輔之。虛名能飾詐。光逸與王尼。何曾有先見。不能救其衰。張華徒竭力。無以扶其危。至今西晉書。讀之堪涕洟。爾來歷千年。炎宋運重熙。東州有逸黨。尊大自相推。號曰方外友。蕩然絕四維。

六籍被詆訶。三皇遭毀訾。坑儒愚黔首。快哉秦李斯。與世立憲度。迂哉魯先師。流宕終忘反。惡聞有民彝。或爲童牧飲。垂髮以相嬉。或作概量歌。無非市井辭。或作薤露喝。發聲令人悲。或稱重氣義。金帛不爲賫。或曰外形骸。頂踵了無絲。塵聚復優雜。何者爲尊卑。遙聞風波民。未見如調飢。偶逢紳帶士。相對如拘糜。不知二紀來。此風肇自誰。都緣極顯地。多用寧馨兒。斯人之一唱。翕然天下隨。斯人之一趨。靡然天下馳。鄉老爲品狀。不以逸爲嗤。宗伯主計偕。不以逸爲非。私庭訓弟子。多以逸爲宜。公朝論人物。纘以逸爲奇。家國盡爲逸。禮法從何施。我常病其事。中夜起思惟。平地三尺限。空車登無歧。重載歷百仞。所來因陵遲。萬一染成俗。雖悔何由追。衆人皆若夢。焉能分其麀。衆人皆若醉。不知啜其醜。天下皆病痿。俾誰就魯醫。天下皆病狂。何暇炙其眉。幸有名政黨。可與決雄雌。所嗟九品賤。不得立文墀。賈誼唯慟哭。梁鴻空五噫。終削南山竹。冒死指其疵。願乘九廟靈。感悟宸心知。赫爾奮獨斷。去邪在勿疑。分捕復大索。儉人無子遺。大者肆朝市。其徒竄海湄。殺一以戒萬。是曰政之基。千奴共一膽。膽破衆自隳。無使永嘉風。敗亂昇平時。

贈張績禹功

石介

李唐元和間。文人如蠶起。李翱與李觀。言雄破姦宄。孟郊及張籍。詩苦動天地。持正不退讓。子厚稱絕偉。元白雖小道。爭名愈弗已。卒能霸斯文。昌黎韓夫子。吾宋興國來。文人如櫛比。黃州才專勝。漢公氣全粹。晦之號絕羣。平地走虎咒。謂之然駁雜。亦文中騏驥。白稹洎盧震。江沱自爲水。朱巖兼孫僅。培塿對嶽峙。卒能霸斯文。河東柳開氏。嗟吁河東沒。斯文乃屯汨。汨三十年。淫洼滿人耳。粵從景祐後。大儒復唱始。文人如麻立。樅樅戰戰騎。徂徠山磊砢。生民實頑鄙。容貌不動人。心膽無有比。不度蹄涔微。直欲觸鯨鯉。

有慕韓愈節。有肩柳開志。今讀禹功文。矛戟寒相倚。寶光千里高。飛出破屋裏。龍音萬丈長。拔出重淵底。雷霆皆藏身。日星或失次。我慚年老大。才力漸衰矣。禹功氣奔壯。今方二十二。前去吾之年。猶有十四歲。今讀禹功文。魂魄已驚悸。更加十四年。世應絕儔類。卒能霸斯文。吾恐不在己。禹功幸勉旃。當仁勿讓爾。

小孤山

劉敞

驚波觸南崖。反怒射北壁。蒼山與相排。所謂小孤石。蟠根萬仞淵。聳角百丈碧。祠堂豁精嚴。行旅進粉澤。或云婦女神。胙饗頗有迹。吾知定名意。似欲旌介特。流俗失其真。傳聞莫開釋。居人私其利。禍福妄損益。競爲媚妒說。以誣聰明德。先王拱山川。禮典有廟食。柰何媚於竈。屈己忘正直。吾欲爲小孤。作書解行客。復恐不見從。嗟哉世多惑。

雜詩效玉川體

劉敞

毀巢鳳不至。竭澤龍不游。賢者有所歸。得非龍鳳儔。周公下白屋。聖德被九州。趙禹謝賓客。漢朝以爲優。澆淳不相襲。用合何其繆。苟徇一身利。不爲萬姓謀。哀彼杖杜詩。死生遺道周。

雜詩二首

劉敞

鑿井取泉飲。上山採薇食。豈不信憔悴。所願皆我力。泉也非難致。薇也不易得。志士恥徒飽。衆人苟所獲。犧牲畏芻豢。樊籠害羽翼。晤理宜在早。無爲晚更惑。道薄德亦散。功名爲時須。用力世所賢。守正衆云愚。智者競蒿目。小人復邇圖。悠悠三季後。此風益已渝。安知治未病。舐痔而多車。堯舜無能名。越哉已矣夫。

示張直溫

劉敞

築山必使高鑿，井必使深，百工戒淺近。盛德羞浮沉，焉有尺寸枝，能棲垂天禽。焉有升斗泉，能容橫江鱗。借茲諭物理，足以開君心。隘在容不足，弱在力不任。大道如路然，固無古與今。

朝乘

劉敞

朝乘日車出，暮載星影還。顛冥朝暮中，出入咫尺間。已覺素志非，更知人理艱。小利專欲速，大德不踰閑。

哀張子厚先生

司馬光

先生負材氣，弱冠游窮邊。麻衣揖鉅公，決策期萬全。謂言叛羌輩，坐可執而鞭。意趣小參差，萬金莫留連。中年更折節，六籍事精研。義農訖周孔，上下皆貫穿。造次循繩墨，儒行無少愆。師道久廢闕，模範幾無傳。先生力振起，不絕尙聯緜。教人學雖博，要以禮爲先。庶幾百世後，復覩三王前。釋老比尤熾，羣倫將蕩然。先生論性命，指示令知天。聲光動京師，名卿爭薦延。寘之石渠閣，豈徒脩簡編。丞相正自用，立有榮枯權。先生不可屈，去之歸臥堅。孤嫠聚滿室，餬口耕無田。欣欣茹藜藿，皆不思肥鮮。近應詔書起，尋取病告旋。舊廬不能到，丹旆風翩翩。人生會歸盡，但問愚與賢。借令陽虎壽，詎足驕顏淵。況於朱紫貴，飄忽如雲煙。豈若有清名，高出太白巔。門人俱經帶，雲梯會松阡。厚終信爲美，繼志仍須專。讀經守一作書，舊學勿爲利。祿遷好禮效，古人勿爲時所一作俗。牽修內勿修外，執中勿執偏。當令洙泗風，郁郁滿秦川。先生儻有知，無憾歸重泉。

今古路

司馬光

出門道路多。縱橫不可測。我今欲遠行。須問曾行客。徐徐逢路人。借問青松側。客曰今何往。答之遊京國。客乃指要路。而言行有益。古路雖大道。不如今路直。但行今人路。猶如假羽翼。彼客別我去。獨自躊躇立。爲見今古路。信乃無苦忒。今路足輪蹄。古路多荆棘。欲行今人路。恐背古人跡。欲行古人路。今人笑迂僻。又擬不出門。奈何饑寒逼。哀哀此時路。悠悠蒼天色。不避今人嫌。路須行古陌。古陌雖然遠。且保無蹶失。勉哉自勉哉。前去難之適。不獲見楊朱。萬古凝愁魄。

漢文帝

王安石

輕刑死人衆。短喪生者儉。仁孝自此薄。哀哉不能謀。露臺惜百金。灞陵無高丘。淺恩施一時。長患被九州。

戴不勝

王安石

昔在宋王所。皆非薛居州。區區一不勝。辛苦亦何求。懷祿詎有恥。知命乃無憂。此士自可憐。能復識此不。

司馬遷

王安石

孔鸞負文章。不忍留枳棘。嗟子刀鋸間。悠然止而食。成書與後世。憤悱聊自釋。領略非一家。高辭殆天得。雖微樊父明。不失孟子直。彼欺以自私。豈啻相十百。

揚雄

王安石

孔孟如日月。委蛇在蒼旻。光明所照耀。萬物成冬春。揚子出其後。仰攀忘賤貧。衣冠眇塵土。文字爛星辰。歲晚天祿閣。強顏爲劇秦。趨舍迹少迂。行藏意終隣。壤壤外逐物。紛紛輕用身。往者可返。吾將與斯人。

楊劉

王安石

人各有是非。犯時爲患害。唯詩以譎諫。言者得無悔。厲王昔監謗。變雅今尙載。末俗忌諱繁。此理寧復在。南山詠種豆。議法過四罪。玄都戲桃花。母子受顛沛。疑似已如此。況欲諄諄誨。事變故不同。楊劉可爲戒。

日出堂上飲

王安石

日出堂上飲。日西未云休。主人笑而歌。客子歎以愀。指此堂上柱。始生在巖幽。雨露飽所滋。凌雲亦千秋。所託願永久。何言值君收。乃令卑溼地。百蟻上窮餒。丹青空外好。鎮壓已堪憂。爲君重去之。不使一蟻留。蟻力雖云小。能生萬蚍蜉。又能高其礎。不爾繼者稠。語客且勿然。百年等浮漚。爲客當酌酒。何豫主人謀。

我欲往滄海

王安石

我欲往滄海。客來自河源。手探囊中膠。救此千載渾。我語客徒爾。當還治崑崙。歎息謝不能。相看涕纍盆。客止我且往。濯髮扶桑根。春風吹我舟。萬里空自存。

少狂喜文章

王安石

少狂喜文章。頗復好功名。稍知古人心。始欲老蠶耕。低徊但志食。邂逅亦專城。仰慚冥冥士。俯愧擾擾氓。良夜未渠央。青燈數寒更。撥書置左右。仰屋慨平生。

今日非昨日

王安石

今日非昨日。昨日已可思。明日異今日。如何能勿悲。當門五六樹。上有蟬鳴枝。朝聽尙壯急。暮聞已衰遲。仰看青青葉。亦復少華滋。萬物同一氣。固知當爾爲。我友南山居。笑談解人頤。分我秋柏實。問言歸何時。衣冠汗窮塵。苟得猶苦飢。低徊歲已晚。恐負平生期。

田漏

王安石

占星昏曉中寒暑已不疑。田家更置漏。寸晷亦欲知。汗與水俱滴。身隨陰屢移。誰當哀此勞。往往奪其時。

送潮州呂使君

王安石

韓君揭陽居。戚嗟與死隣。呂使揭陽去。笑談面生春。當復進趙子。詩書相討論。不必移鱷魚。詭怪以疑民。有若大顛者。高材能動人。亦勿與爲禮。聽之汨彝倫。同朝敍朋友。異姓接昏姻。恩義乃獨厚。懷哉余所陳。

雜詠

王安石

懷王自墮馬。賈傳至死悲。古人事一職。豈敢苟然爲。哭死非爲生。吾心良不欺。滔滔聲利間。絳灌亦何知。

謝公

泰安御名

王安石

走馬白下門。投鞭謝公墩。昔人不可見。故物尙或存。問樵樵不知。問牧牧不言。摩挲蒼苔石。點檢屐齒痕。想此絳長檣。想此倚短轅。想此玩雲月。狼籍盤與鱸。井逕亦已沒。漫然禾黍村。摧藏羊曇骨。放浪李白魂。亦已同山丘。緬懷蒔蘭蓀。小草戲陳迹。甘棠詠遺恩。萬事付鬼錄。恥榮何足論。天機自開闔。人理孰畔援。公色無懼喜。儻知禍福根。涕淚對栢伊。暮年無乃昏。

同昌叔賦鴈奴

王安石

鴈鴈無定棲。隨陽以南北。嗟哉此爲奴。至性能懇惻。人將伺其殆。奴輒告之亟。舉羣寤而飛。機巧無所得。夜或以火取。奴鳴火因匿。頻驚莫我捕。顧謂奴不直。嗷嗷身百憂。泯泯衆一息。相隨入繒繳。豈不聽者惑。偷安與受紿。自古有亡國。君看鴈奴篇。禍福甚明白。

寓言四首

王安石

不得君子居。而與小人游。疵瑕不相摩。況乃禍釁稠。高語不敢出。鄙辭強顏酬。始云避世患。自覺日已偷。如無一齊人。以萬楚人咻。云復學齊言。定復不可求。仁義多在野。欲從苦淹留。不悲道難行。所悲累身修。周公歌七月。耕稼乃王術。宣王追祖宗。考牧與宮室。甘棠能聽訟。召伯聖人匹。後生論常高。於世復何實。曹魯俗所共。察察與世違。違世有百善。一疵惡皆歸。就求無所得。猶以好名譏。彼哉負且乘。能使正日微。言失於須臾。百世不可除。行失几席間。惡名滿八區。百年養不足。一日毀有餘。諒彼恥不仁。戒哉惟厥初。

遊土山示蔡天啓

王安石

定林瞰土山。近乃在眉睫。誰謂秦淮廣。正可藏一牒。朝予欲獨往。扶僮強登涉。蔡侯聞之喜。喜色見兩頰。呼鞍追我馬。亦以兩鯨挾。斂書付衣囊。裹飯隨藥笈。脩脩阿蘭若。土木老山脅。鼓鍾臥空曠。簾簾雕棗業。升堂廊無主。考擊誰敢輒。坡陀謝公冢。藏椁久穿劫。百金買酒地。野老今行饑。紆懷起東山。勝踐比稠疊。於時國累卵。楚夏血常喋。外實備艱梗。中仍費調燮。公能覺如夢。自喻一蝴蝶。桓温適自斃。符堅方天厭。且可緩九錫。寧當快一捷。彼哉斗筭人。得喪易矜怯。妄言屐齒折。吾欲刊史牒。傷心新城隸。歸意終難愜。漂搖五城舟。尙想浮河楫。千秋隴東月。長照西州堞。豈無華屋處。亦捉蒲葵蕙。碎金諒可惜。零落隨秋葉。好事所傳玩。空殘法書帖。清談眇不嗣。陳迹恍如接。東陽故侯孫。少小同鼓篋。一官初嶺海。仰視飛鳶跼。窮歸放款段。高臥停遠蹠。牽襟肘卽見。著帽耳纔擻。數掾危敗屋。爲我炊陳浥。雖無膏汗鼎。尙有羹濡筴。縱言及平生。相視開笑靨。邯鄲枕上事。且飲且田獵。或昏眠委翳。或妄走超躡。或叫號而寤。或哭泣而覿。

幸哉同勝時。田里老安帖。易牛以寶劍。繫壤勝彈缺。追憐衰晉末。此土方岌嶮。強偷須臾樂。撫事終愁慄。予雖天戮民。有械無接摺。翁今貧而靜。內熱非復葉。予衰極今歲。儻與雞夢協。委蛻亦何恨。吾兒已長鬣。翁雖歲長我。未見白可鑷。祝翁尙難老。生理歸善攝。久留畏年少。譏我兩咕囁。束火扶路還。宵明狐兔懾。蔡侯雄俊士。心憶形亦謀。異時能飛輕。快若五陵俠。胡爲阡陌間。踈足僅相躡。諒欲交轡語。怯子不能嚼。

夜夢與和甫別如赴北京時和甫作詩覺而有作因簡純甫

王安石

水菽中歲樂。鼎茵暮年悲。同胞苦零落。會合尙淒其。況乃夢乖闊。傷懷而賦詩。詩言道路寒。乃似北征時。叔兮今安否。季也來何遲。中夜遂不眠。輾轉涕流離。老我孤主恩。結草以爲期。異叔善事國。有知無不爲。千里永相望。昧昧我思之。幸唯季優游。歲晚相攜持。於焉可晤語。水木有茅茨。晚蘭佇歸憩。遠屋正華滋。

獨臥有懷

王安石

午鳩鳴春陰。獨臥林壑靜。微雲過一雨。浙瀝生晚聽。紅綠紛在眼。流芳與時競。有懷無與言。佇立鍾山暝。

宋文鑑卷第十七

五言古詩

分題得瘦木壺

呂公著

寄題徑山懷郎簡侍郎

張瓌

過介甫歸偶成詩

曾鞏

劉景升祠

曾鞏

看白雲愛而成詩

狄遵度

哀老婦

李泰伯

悠悠西江水送李殿丞

王回

魯恭太師廟

韓維

服除送兄弟還都

韓維

靈溝道中

韓維

謁孔先生

韓維

下橫嶺望寧極舍

韓維

景仁示去歲所賦菊屏菊塔二詩輒以一篇答之

韓維

讀書

舉舉媚學子

呼雞

秋懷

雜詩

采選示王聖美葛子明諸友

介亭

讀魏世家

夏日獨居二首

堂上有遺羶

忘言

異服

探鼻此

兵器

送同年蒲叔範察判杭州監酒

四事

傅堯俞

王令

王令

王令

王令

王令

孫覺

王安國

王安國

王安國

王安國

王陶

鄭獬

陶弼

王疇

邵雍

高竹

巢鳥

臨水

次韻和子儀問蟬

自警

檢覆邳城旱田示同官及寄河南諸賢

雜詩

齊魯

擬古

漕舟

題福唐津亭

分題得瘦木壺

天地產衆材。任材謂之智。棟桷與楹杙。大小無有棄。方者以矩度。圓者中規制。嗟爾木之瘦。何異肉有贅。生成擁腫姿。賦象難取類。爨括所不施。鈎繩爲爾廢。大匠睨而往。惻然乃有意。孰非造化功。而終朽不器。刳剔虛其中。朱漆爲之僞。鄭漿挹酒醴。施用惟其利。犧象非不珍。金罍豈不貴。設之於楹階。十目肯注視。幸因左右容。反見謂奇異。人之於才性。夫豈遠於是。性雖有不善。在教之揉勵。才亡不可用。由上所措置。

邵雍

張光

黃亢

黃庶

范純仁

劉敞

劉敞

劉敞

劉敞

沈文通

陳烈

呂公著

飾陋就其長。皆得爲良士。執一以廢百。衆功何由備。是惟聖人心。能通天下志。

寄題徑山懷郎簡侍郎

張瓌

天地一洲渚。北平南歛危。幽并深以厚。江湖清且奇。武林頗英秀。川匯仍山卑。應接殫天巧。類非人力爲。徑山最佳處。有巖稱玉芝。居防俗士駕。地乃賢人宜。郎公留名德。平時爲羽儀。引年歸故里。不復衣朝衣。留侯黃石心。白傅香山期。結字名勝外。日與塵事違。泉石景物狀。盡在諸賢詩。伊予來東藩。濫持使者麾。平生愛山水。弗憚命駕之。當候秋風高。遠造巖下扉。漣濯纓上塵。散步松閒基。未能繼高躅。聊用慰所思。

過介甫歸偶成

曾鞏

結交謂無嫌。忠告期有補。直道詎非難。盡言竟多迂。知者尙復然。悠悠誰可語。

劉景升祠

曾鞏

景升得二蒯。坐論勝凶殘。正當喪亂時。能使憔悴寬。繽紛多士至。肅穆萬里安。能收衆材助。圖大信不難。諸公龍鳳姿。有待久盤桓。得一固足興。致之豈無端。迺獨采樗櫟。不知取椅檀。蓋云器有極。在理良足歎。

看白雲愛而成詩

狄遵度

秋風吹白雲。觸處自何谷。初猶半洞門。欵出遍巖腹。零落依水湄。片段挂枯木。餘影透微白。滅跡混空綠。煙蘿自蘼蒼。鳥淑徒縈曲。安知蒼梧野。下覆猿鳥哭。誰能久徘徊。返顧視黃鵠。

哀老婦

李泰伯

里中一老婦。行行啼路隅。自悼未亡人。暮年從二夫。寡時十八九。嫁時六十餘。昔日遺腹兒。今茲垂白鬚。

子豈不欲養母。豈不懷居。繇役及下戶。財盡無所輸。異籍幸可免。嫁母乃良圖。牽車送出門。急若盜賊驅。兒孫孫有婦。小大攀且呼。回頭與永訣。欲死無刑誅。我時聞此言。爲之長歎嗚。天民固有窮。鰥寡實其徒。仁政先四者。著在孟軻書。吾君務復古。且且師黃虞。赦書求節婦。許與旌門閭。繫爾愚婦人。豈曰禮所拘。蓬茨四十年。不知形影孤。州縣莫能察。詔旨成徒虛。而況賦役閒。羣小所同趨。姦欺至骨髓。公利未鎔銖。良田歲歲賣。存者唯萊汙。兄弟欲離散。母子因變渝。天地豈非大。曾不容爾軀。嗟嗟孝治主。早晚能聞諸。吾言又無位。反袂空漣如。

悠悠江西水送李殿丞

王回

殿中丞李侯清叔。筦穎之酒事三年。入朝闕下。將別。其往還寮友。皆索言焉。長樂王回。辱清叔之交最深。而慕其才志魁特。將有以成功名於世也。以謂挾此才潛此志者。第循其本而完之。則物之應者自廣。然功名之成否。豈足道哉。故作悠悠江西水詩一章。以興其義。塞清叔之索。而聊寫其意云。

悠悠江西水。浩浩拍兩涯。深澗含淵潭。澄澄露陂池。介鱗育性命。跳泳各適宜。人謀濟任途。航楫又泓洄。飄風吼天地。白浪相翻飜。旁觀駭非常。水德自不虧。風收浪還恬。狎者終何疑。賢豪應世務。有本亦若茲。剛明發其用。愷悌以成之。外物雖構來。我心固如夷。功名豈足道。請監江水詩。

魯恭太師廟

韓維

善教邈無跡。其流在民心。君看魯太師。廟食猶至今。豈如文俗士。朱墨坐浮沉。趨營止目前。不顧患害深。去漢餘千載。此弊竟相尋。我行道祠下。感激爲悲吟。不見田雉馴。啼鴉空滿林。

服除送兄弟還都

韓維

日月忽已遠。再見新穀升。喪期有常數。吉我衣與纓。倚仰自悲吒。淚下肝膽崩。尚惟立身報。未卽泯餘生。肅肅忠憲公。秉德輔休明。報國有遺意。訓言猶在聽。況茲世厚恩。兄弟秩王庭。一朝出門去。事業各有營。上當答君仁。下以爲親榮。獨此抱痾瘵。謝喧守柴荆。掃冢奉時祭。履田課春耕。旣無公家責。聊徇狷者情。出處雖云異。要以道爲程。

靈溝道中

韓維

春風來無迹。泱莽天地和。羣生樂時陽。衆鳥舞且歌。嗟爾道傍叟。寒餒獨見羅。短席不自蔽。皮骨榨枯柯。呼童問所以。口噤不得哦。所見且如此。況餘生齒多。吾聞古三代。仁術固匪他。老幼孤洎疾。餼養平不頗。斯道久寂寞。吾悲其柰何。

謁孔先生

韓維

月出高樹枝。影動酒樽處。樹深月色薄。稍以燈火助。主人喜我過。斟酌亦云屢。於時幸無累。所談非近務。涼風自遠至。清景淡吾慮。方斯西山秋。歷覽陪杖屨。

下橫嶺望寧極舍

韓維

驅車下峻坂。西走龍陽道。青煙人幾家。綠野山四抱。鳥啼春意闌。林變夏陰早。應近先生廬。民風亦淳好。景仁示去歲所賦菊屏菊塔二詩。輒以一篇答之。

韓維

斯民去古遠。日與巧僞遷。粲粲黃金花。揉屈同杯捲。列屏聳浮圖。光彩生盤筵。匪惟悅羣兒。愛詠及華顛。

我欲叱園吏。解結除其編。萬物有本性。各使歸自然。

讀書

傅堯俞

吾屋雖喧卑。頗不甚蕪穢。置席屋中閒。坐臥羣書內。橫風吹急雨。入屋洒我背。展卷殊未知。心與昔人會。有客自外來。笑我苦癡昧。且問何爲爾。我初尙不對。強我不得已。起答客亦退。聊復得此心。沾濕安足悔。

舉舉媚學子

王令

舉舉媚學子。居曰不吾知。知而有不能。無乃失於欺。不知未爲患。不欺浩難期。咄哉天下懷。何以天下爲。

呼雞

王令

雞呼雞來前。犬嗾犬至止。夫豈必可召。役以食乃爾。今吾曷爲悲。人而雞犬爲。自計無自存。西山謝夷齊。

秋懷

王令

槭槭庭樹葉。朝零非昔稠。啾啾草蟲鳴。暮急曉未休。爾蟲無不平。豈亦有哀憂。胡爲勞呻吟。與士感傷投。壯士亦何者。哀哦與蟲酬。所抱不列陳。調苦難謠謳。極目有遠見。直懷羞曲求。蒿藜襲久安。功名忘前收。日月忽未幾。天地今復秋。少壯負所懷。老大安能謀。生無及人功。死骨埋泉羞。胡爲不奮飛。徒與寒餓讎。

雜詩

王令

古人重非道。飢不苟豆羹。有爲非其心。或不脫冕行。如何後世人。以官業其生。鄙哉樂欺人。猶以學爲名。

采選示王聖美葛子明諸友

王令

酒樽厭運行。衆客喧已醉。忽得簿上籍。共出聲名外。孤昂忽雄軒。泯默亦馴致。追爭相後先。得失自愚智。

隨時有能稱。遂覺得訶訾。雖非人力爲。適與天幸值。或競以禍覆。亦有終自遂。卒無及物效。徒有高人氣。回樽變新局。忽若已異世。嗟人久以迷。高爵樂自嗜。誰爲衍衍飽。競逐孜孜利。矜驕侈維奢。摧折嘆淹滯。昏昏忘所大。擾擾爭其細。安知茫昧閒。身非天所戲。是非未暇辨。歡戚先已至。退之昔裁詩。頗以豪橫恃。暮年意氣得。金玉多自慰。買居紀廂榮。顧影樂冠佩。喜將閭巷好。持與妻子議。彼哉何足道。進退茲焉係。安知九列榮。顧是德所累。寧論聖人爲。適莫固以義。有時曲肱樂。不以易富貴。吾曹頗勉脩。茲道久自詣。何必問浮雲。斯理固可視。

介亭

孫覺

真人昔未起。奔鹿駭四方。連延天目山。兩乳百里長。有地跨江海。無種生侯王。中霄燎穹旻。列石表壇場。朱旗大梁野。英氣吞八荒。寥寥百年後。故物亦已亡。所餘彼巉巖。峯巔屹相望。主人承明老。星斗工文章。築亭紫霄上。坐客蒼株旁。攀雲弄明月。曉星生扶桑。禹山隔波濤。簡書永埋藏。願逢希夷使。水土還故常。讀魏世家

王安國

竇膺談先王。古今誰有得。施爲雖緒餘。要在情不匿。嗟彼三代後。淪胥入戰國。翟璜聞一言。僂俛慙李克。論材稱權衡。輕重無物惑。吾心能如此。乃可任人責。

夏日獨居二首

王安國

竹苗敷夏陰。蘿蔓蔽朝亮。感此節物佳。百骸適無恙。委蛇投廣廈。蕭瑟絕遺響。稍讎簡編餘。俄得冠裾放。身雖勢利乖。心遂弦歌尙。默然想聖賢。游世無得喪。抱關秉翟閒。未分棄冗長。人生適意難。聊各安所鄉。

晰晰池沼。綠萍隨下。上。鸞鷺堂。廡燕。白晝容俛仰。顧我亦晏如。環廬花藥長。無材助太平。得地幸閒曠。稍披千古書。日覺神明王。乘閒盼物情。自適忘外獎。涵濡覆載仁。誰廢魚麗唱。黃塵洮隴戍。黑霧荆衡饒。奔波喝道邊。畢命營邊障。吾此獨何爲。飛潛樂能饗。何時聞解嚴。慰彼西南望。當使少陵翁。得見廉恥將。

堂上有遺糶

王安國

堂上有遺糶。堂下無聚蟻。但知嗜欲求。不必風雨至。客方笑營營。貪得故無幾。安知萬類中。趨舍忘彼己。天乎顧人寰。等是一時戲。受形巨細分。疇患後先爾。浸淫蚍蜉生。穴柱從此始。莊生亦知言。信矣當棄智。

忘言

王安國

宋國旌孝子。東門毀以斃。楚王好細腰。後宮餒而瘠。物情信可憐。徇外易生死。身存寵可誇。亡矣安所恃。吾今思彼哉。未足語擇利。擾擾智驚愚。卑卑學阿世。吹噓出虹蜺。頓挫入塵滓。愛憎雖人爲。榮辱乃天使。恩無斯須懷。怨已塞天地。百年呼吸中。毫髮誰豫已。達者默然窺。陰陽驅意氣。始終本何有。一息累萬世。由來適人適。宿昔多如此。喟余聊自欲。安得忘言士。

異服

王陶

辛有歎被髮。趙靈喜胡服。遂成陸渾戎。終有沙丘辱。用夷反變夏。亡禮以從俗。先王仁義術。詎用此求福。齊桓九合功。不以兵車轂。仲尼歎微管。幾爲左袵屬。爾來豪俠兒。往往異裝束。耀武何必然。禦戎有前躅。余敢告司關。異服宜禁肅。

採鳧苾

鄭獬

朝携一筐出。暮携一筐歸。十指欲流血。且急眼前飢。官倉豈無粟。粒粒藏珠璣。一粒不出倉。倉中羣鼠肥。

兵器

陶弼

五代乏眞主。奸雄何僭僞。橫磨闔刀劔。白日相篡弑。我宋有神祖。潛德動天意。故天意若曰。往爲我之嗣。神祖拜稽首。乃卽皇帝位。不惠兆民樂。不怒諸侯畏。顛倒執玉帛。奔走恐後至。大商國三分。一朝有其二。太宗以義撫眞宗。以仁治王道。竹箭直。誦聲金鼎沸。獨有陰山戎。時時寇邊地。天子赫斯怒。大警巡瀆衛。射殺右賢王。遂斷匈奴臂。狼心帖然服。結好同昆弟。自此兩河閒。寂寂無戎備。卒閑喜夜歌。將老貪春睡。自此爲太平。恍逾三十歲。戎昊乘我閒。南馳賀蘭騎。陽關久夜開。樞朽不可閉。陣雲起秦雍。殺氣橫涇渭。使臣股慄奏。宰相瞋目議。僉曰亟發兵。豎子坑甚易。倉惶築邊壘。未戰力先瘁。逼迫開庫兵。土蝕鋒鏘脆。防秋採舊屯。推轂謀新寄。舊屯老且死。少者無實藝。良由不訓練。手足迷擊刺。新寄將家子。從小生富貴。六韜未嘗讀。口但知肉味。師復從中御。進退由閹寺。權輕號令冗。兩戰無遺類。曹公棄七軍。晉人獲三帥。吾兵自此喪。有詔新其製。此器不預設。一旦何從致。朝廷急郡縣。郡縣急官吏。官吏無它術。下責蚩蚩輩。耕牛拔筋角。飛鳥禿翎翅。斡截會稽空。鐵烹董山碎。供億稍後期。鞭扑異他罪。愁氛壅太虛。霧景晝冥晦。我聞郭汾陽。料敵多奇異。單箠諭突厥。蕃酋膝雙墜。又聞李西平。臨戎有英氣。身著紅錦袍。懷光肝膽碎。是知用兵術。在人不在器。君耳舜高聽。君目舜明視。願探謀略長。勿倚干戈銳。

送同年蒲叔範察判杭州監酒

王疇

釋之久未調。王粲嘗從軍。謂言塞垣事。壯氣橫風雲。育材幸明代。薦賢無令君。如何漢酤穴。沉此荆山珍。

萍氏本幾酒。周官有彝倫。孝武事攘卻。志清天地屯。連兵無時已。四海蕭然貧。官始操釀具。權之飽師人。利源一以洩。頽波蕩無垠。糜穀費耒耜。良甕爭清醇。酒禁著律令。犯笞及其身。狂藥乃陷穿。傷哉堯舜民。炎靈屬我后。天資英且仁。邦力早雄富。漢制仍相循。歲賦二十萬。經入固已勤。大農天下酒利。歲獲縉如此。彌年擁武節。乘邊清國氛。英雄百萬師。跨邁聯燕秦。仰給傾府庫。賞賚圖戎勳。加斂猶不足。返古當何云。杭城東南劇。地將湖海鄰。權利冠天下。旗亭壓重闐。彼雖斗筭職。亦擇才英臣。風露氣已肅。溪潭寒彌新。沙榜朝泛泛。吳濤暮云云。南州近牛斗。氣象雄霜旻。汀楓變老枿。赤葉晴相紛。嘗茶泊幽寺。觀魚下輕輪。行當收翹楚。寧復混蒸薪。無爲狎吳叟。坐戀秋江蓴。

四事

邵雍

會有四不赴。時有四不出。公會。生會。廣會。醜會。無貴亦無賤。無固亦無必。里閭閑過從。身安心自逸。如此三十年。幸逢太平日。

高竹

邵雍

高竹碧相倚。自能發餘清。時時微風來。萬葉同一聲。道汙得夷理。物虛含遠情。階前閑步人。意思何清平。

巢鳥

張先

鳥啼東南林。危巢鷓五六。心在安巢枝。一日千往復。脫網得羣食。入口不入腹。窮生俾反哺。豈能報成育。

臨水

黃亢

人生朝復暮。水波流不駐。去年昨日水。今日到何處。惆悵雨殘花。嫣紅隨水去。花落水東流。識盡人生事。

次韻和子儀問蟬

黃庶

落日掛樹間。長我亭下陰。園林動秋意。高蟬忽微吟。清風轉餘聲。杳若下遠岑。微物感時節。鏗鏘吐商金。古樂久破碎。茲蟲抱金音。荒忽尙偃蹇。激起壯士心。願爲秋蟬操。被之朱絲琴。

自警

范純仁

憶昔爲小官。位卑職易營。朋知喜其勤。民口亦見稱。中間忝臺諫。已覺言難行。然賴識者恕。尙謂無敬傾。數年忽遭遇。用大過其能。名虛稱不實。任重力難勝。具瞻不可欺。舉動招譏評。士論因不與。自知亦甚明。祿厚難報答。徒茲驕侈萌。子孫忘艱難。服用饒誇矜。清白素風滅。冗長浮費增。親舊多責望。厚薄貽怨憎。貧賤勝富貴。古語信可憑。請病蒙罷免。方幸憂責輕。俄復統一道。撫民帥邊兵。寇狂適偃蹇。民疲未蘇醒。勝負繫司命。休戚及羣氓。細務委將佐。大事稟朝廷。所稟有違從。委擇有不精。差失雖毫釐。致敗或丘陵。殞身何足道。誤國玷家聲。可不常惕懼。臨淵履春冰。庶幾免危溢。書此爲心銘。

檢覆郊城旱田示同官及寄河南諸賢

劉敞

昔歲歉無年。今麥仍薦飢。罷民去南畝。賤價捐東菑。藉藉道路間。餓者何纍纍。藜藿不充腸。齠然旄與倪。嗟我祿代耕。每食爲不怡。徒懷仲由志。身賤邠得施。屬城上民訟。比牒皆苦詞。奉詔實有無。百聞謝一窺。星言說桑田。行與父老期。觸熱不敢休。重趼寧告疲。郊原赤如赭。秉穗無子遺。藪藝不可分。四旁生蒺藜。流行誠代有。愚弱豈易欺。附上亦有刑。殘下罪攸司。鄙夫不忍此。告吏咸赦之。庶茲咻噢恩。足以蘇惛瘖。大農急經費。言利析毫釐。二吾猶不足。一切寧謂宜。國僑敏爭承。鄭邑用不危。馮諼焚券書。田氏人若歸。

區區二小邦。兩士能若斯。當官在必行。匪石安可移。諸公悉吾友。此志良弗非。當令徇路人。一聽狂者詩。

雜詩

劉敞

齊有梁丘據。晉有樂王鮒。據能愛晏嬰。鮒欲殘叔譽。二臣嬖兩朝。事君爲悅豫。景有尙賢志。據逆以爲助。平失宥善心。鮒乃速其去。毋以據爲賢。易地則同趣。丈夫處世閒。必有遇不遇。豈無覺者乎。正色君亦悟。區區嬖幸徒。何忍就朋附。

齊魯

劉敞

齊魯大儒師。專門盛章句。應物非己長。何以責成務。乃其忠孝心。足可事君父。不如商利徒。反道趨詭遇。剝牀以及膚。泉貨山嶽聚。賜金再百斤。封邑成千戶。若毋天事變。豈不厚且固。商鞅旣誅夷。桑羊亦刀鋸。寄言逢衣人。施施幸安步。

擬古

劉敞

老萊隱窮楚。因與時世隔。暮歸怪車轍。夜起辟山澤。若人不可見。況肯低顏色。安知叢臺下。一旦三千客。西遷竟不還。嗟哉莫良畫。

漕舟

沈文通

漕舟上太倉。一鍾且千金。太倉無陳積。漕舟來無極。畿兵已十萬。三垂戍更多。廟堂方濟師。將奈東南何。

題福唐津亭

陳烈

溪山龍虎蟠。溪水鼓角喧。中宵鄉夢破。六月夜衾寒。風雨生殘樹。蛟龍喜怒瀾。慙慙祝舟子。移棹過前灘。

宋文鑑卷第十八

詩

五言古詩

懷賢閣

和子由記園中草木二首

調水符

贈劉莘老

甘露寺

垂雲亭

西齋

司馬君實獨樂園

除夜病中贈段屯田

和頓教授見寄

京師哭任遵聖

張寺丞益齋

宋文鑑卷第十八

二二九

蘇軾 蘇軾 蘇軾 蘇軾 蘇軾 蘇軾 蘇軾 蘇軾 蘇軾 蘇軾 蘇軾 蘇軾

和陶淵明詠三良

蘇軾

和陶淵明詠貧士

蘇軾

夏晝

章望之

宿簡寂觀

袁陟

再遊雲居

袁陟

覆驗餘姚道中

王存

雜興三首

鮮于侁

新堂夜坐

鮮于侁

海州觀放鵝搏兔不中而飛去

沈括

觀餘姚海氛

謝景初

餘姚董役海隄有作

謝景初

法喜堂

謝景初

村居

文與可

新晴山月

文與可

屬疾梧軒

文與可

北山僧舍有閣曰懷賢南直斜谷西臨五丈原諸葛孔明所從出師也

蘇軾

南望斜谷口。三山如犬牙。西觀五丈原。鬱屈如長蛇。有懷諸葛公。萬騎出漢巴。吏士寂如水。蕭蕭聞馬槌。公才與曹不。豈止十倍加。顧瞻三輔間。勢若風捲沙。一朝長星墜。竟使蜀婦髻。山僧豈知此。一室老煙霞。往事逐雲散。故山依渭斜。客來空弔古。清淚落悲笳。

和子由記園中草木二首

蘇軾

種柏待其成。柏成人亦老。不如種叢筍。春種秋可倒。陰陽不擇物。美惡隨意造。栢生何苦艱。似亦費天巧。天工巧有幾。肯盡爲汝耗。君看藜與藿。生意常草草。蘆筍初似竹。稍開葉如蒲。方春節抱甲。漸老根生鬚。不愛當夏綠。愛此及秋枯。黃葉倒風雨。白花搖江湖。江湖不可到。移植苦勤劬。安得雙野鴨。飛來成畫圖。

愛玉女洞中水既致兩瓶恐後復取而爲使者見給因破竹爲契使寺僧

蘇軾

藏其一以爲往來之信戲爲之調水符
欺謾久成俗。關市有契繻。誰知南山下。取水亦置符。古人辨淄澠。皎若鶴與鳧。吾今既謝此。但視符有無。常恐汲水人。智出符之餘。多防竟無及。棄置爲長吁。

贈劉莘老

蘇軾

江陵昔相遇。幕府稱上賓。再見明光宮。峩冠揖搢紳。如今三見子。坎坷爲逐臣。朝遊雲霄間。欲分丞相茵。莫落江湖上。遂與屈子鄰。了不見喜慍。子豈真可人。邂逅成一歡。醉語出天真。士方在田里。自比渭與莘。出試乃大謬。芻狗難重陳。歲晚多霜露。歸耕當及辰。

甘露寺

蘇軾

欲遊甘露寺，有二客相過。遂與偕行。寺有石如羊，相傳謂之很石。云諸葛孔明坐其上，與孫仲謀論曹公也。大鐵鑊二，案銘梁武帝所鑄。畫獅子一，菩薩二。陸探微筆，李衛公所留祠。在寺手植柏合抱矣。近寺僧發古殿基，得舍利七粒，并石記，乃衛公爲穆宗皇帝追福所葬者也。

江山豈不好，獨遊情易闌。但有相攜人，何必素所歡。我欲訪甘露，當途無閑官。二子舊不識，欣然肯聯鞍。古郡山爲城，層梯轉朱欄。樓臺斷崖上，地窄天水寬。一覽吞數州，山長江漫漫。卻望大明寺，惟見煙中竿。很石臥庭下，穹隆如伏源。緬懷臥龍公，挾策事瑯鑽。一談收獮子，再說走老瞞。名高有餘想，事往無留觀。蕭公古鐵鑊，相對空團團。坡陀受百斛，積雨生微瀾。泗水逸周鼎，渭城辭漢盤。山川失故態，怪此能獨完。僧繇六化人，霓衣挂冰紈。隱見十二疊，觀者疑夸謾。破板陸生畫，青猊戲盤跚。上有二天人，揮手如翔鸞。筆墨雖欲盡，典刑垂不刊。赫赫贊皇公，英姿凜以寒。古柏親手種，挺然誰敢干。枝撐雲峯裂，根入石窟蟠。薤草得斷碑，斬崖出金棺。瘞藏豈不牢，見伏理可歎。四雄皆龍虎，遺迹儼未刊。方其盛壯時，爭奪肯少安。廢興屬造物，遷逝誰控搏。況彼妄庸子，而欲事所難。古今共一軌，後世徒辛酸。聊興廣武歎，不待雍門彈。

僧清順新作垂雲亭

蘇軾

江山雖有餘，亭榭著難穩。登臨不得要，萬象各偃蹇。惜哉垂雲軒，此地得何晚。天功爭向背，詩眼巧增損。路窮朱欄出，山破石壁很。海門浸坤軸，湖尾抱雲巘。葱蔥城郭麗，淡淡煙村遠。紛紛烏鵲去，一一漁樵返。雄觀快新獲，微景收昔遁。道人真古人，嘯詠慕嵇阮。空齋臥蒲褐，芒屨每自捆。天憐詩人窮，乞與供詩本。

我詩久不作。荒澀旋鋤墾。從君覓佳句。咀嚼廢朝飯。

西齋

蘇軾

西齋深且明。中有六尺牀。病夫朝睡足。危坐覺日長。昏昏既非醉。踽踽亦非狂。寒衣竹風下。穆然中微涼。起行西園中。草木含幽香。榴花開一枝。桑棗沃以光。鳴鳩得美蔭。困立忘飛翔。黃鳥亦自喜。新音變圓吭。杖藜觀物化。亦以觀我生。萬物各得時。我生日皇皇。

司馬君實獨樂園

蘇軾

青山在屋上。流水在屋下。中有五畝園。花竹秀而野。花香襲杖屨。竹色侵盞罍。樽酒樂餘春。碁局消長夏。洛陽古多士。風俗猶爾雅。先生臥不出。冠蓋傾洛社。雖云與衆樂。中有獨樂者。才全德不形。所貴知我寡。先生獨何事。四海望陶冶。兒童誦君實。走卒知司馬。持此欲安歸。造物不我捨。名聲逐吾輩。此病天所赅。撫掌笑先生。年來效瘖啞。

除夜病中贈段屯田

蘇軾

龍鍾三十九。勞生已強半。歲暮日斜時。還爲昔人歎。樂天詩云。行年三十九。歲暮日斜時。今年一線在。那復堪把玩。欲起強持酒。故交雲雨散。惟有病相尋。空齋爲老伴。蕭條燈火冷。寒夜何時旦。勅僕觸屏風。飢鼯嗅空案。數朝閉閣臥。霜髮秋蓬亂。傳聞使者來。策杖就梳盥。書來苦安慰。不怪造請緩。大夫忠烈後。高義金石貫。要當擊權豪。未肯覩衰懦。此生何所似。關盡灰中炭。歸田計已決。此邦聊假館。三徑相成費。一枝有餘暖。願君更信宿。庶奉一笑粲。

和頓教授見寄

蘇軾

我笑陶淵明。種秫二頃半。婦言既不用。還有責子歎。無弦則無琴。何必勞撫玩。我笑劉伯倫。醉髮蓬莠散。二豪苦不納。獨以鐻自伴。既死何用埋。此身同夜旦。孰云二子賢。自結兩重案。笑人還自笑。出口談治亂。一生溷塵垢。晚以道自盟。無成空得懶。坐此百事緩。側聞頓夫子。講道出新貫。豈無一尺書。恐不記庸懦。陋邦貧且病。數米銖稱炭。慚愧章先生。十日坐空館。袖中出子詩。貪讀酒屢暖。狂言各煩慎。勿使輸薪粲。

京師哭任遵聖

蘇軾

十年不還鄉。兒女日夜長。豈惟催老大。漸復成凋喪。每聞耆舊亡。涕洟聲輒放。老任況寄逸。先子推輩行。文章少得譽。詩語尤清壯。吏能復所長。談笑萬夫上。自喜作劇縣。偏工破豪黨。奮髯走猾吏。嚼齒對姦將。哀哉命不偶。每以才得謗。竟使落窮山。青衫就黃壤。官遊久不樂。江海永相望。退耕本就君。時節相勞餉。此懷今不遂。歸見纍纍葬。望哭國西門。落日銜千嶂。平生唯一子。抱負珠在掌。見之齟齬中。已有食牛量。他年如入洛。生死一相訪。惟有王濬冲。心中散狀。

張寺丞益齋

蘇軾

張子作齋舍。而以益爲名。吾聞之夫子。求益非速成。譬如遠遊客。日夜事征行。今年適燕薊。明年走蠻荆。東觀盡滄海。西涉渭與涇。歸來閉戶坐。八方在軒庭。又如學醫人。識病由飽更。風雨晦明淫。跛躄瘖聾盲。虛實在其脉。靜躁在其情。榮枯在其色。壽夭在其形。苟能閱千人。望見知死生。爲學務日益。此言當自程。爲道貴日損。此理在旣盈。願君書此詩。以爲益齋銘。

送鄭戶曹

蘇軾

水遶彭祖樓。山圍戲馬臺。古來豪傑地。千載有餘哀。隆準飛上天。重瞳亦成灰。白門下呂布。大星隕臨淮。尙想劉德輿。置酒此徘徊。爾來苦寂寞。廢圃多蒼苔。河從百步響。山到九里回。山水自相激。夜聲轉風雷。蕩蕩清河壩。黃樓我所開。秋月墮城角。春風搖酒盃。遲君爲坐客。新詩出瓊瑰。樓成君已去。人事固多乖。他年君倦游。白首賦歸來。登樓一長嘯。使君安在哉。

送李公擇

蘇軾

嗟予寡兄弟。四海一子由。故人雖云多。出處不我謀。弓車無停招。逝去勢莫留。僅存今幾人。各在天一陬。有如長庚月。到曉爛不收。宜我與夫子。相好手足侔。比年兩見之。賓主更獻酬。樂哉十日飲。衍衍和不流。論事到深夜。僵仆鈴與騶。頗嘗見使君。有客如此不。欲別不忍言。慘慘集百憂。念我野夫兄。知名三十秋。已得其爲人。不待風馬牛。他年林下見。傾蓋如白頭。

懷西湖寄晁美叔同年

蘇軾

西湖天下景。遊者無愚賢。深淺隨所得。誰能識其全。嗟我本狂直。早爲世所捐。獨專山水樂。付與寧非天。三百六十寺。幽尋遂窮年。所至得其妙。心知口難傳。至今清夜夢。耳目餘芳鮮。君持使者節。風采爍雲煙。清流與碧巘。安肯爲爾妍。胡不屏騎從。暫借僧榻眠。讀我壁間詩。清流洗煩煎。策杖無道路。直造意所便。應逢古漁父。葦間自寅緣。問道若有得。買魚勿論錢。

種松得徠字

蘇軾

春風吹榆林。亂葉飛作堆。荒園一雨過。戢戢千萬栽。青松種不生。百株望一枚。一枚已有餘。氣壓千晦槐。野人易斗粟。云自魯徂徠。魯人不知貴。萬竈飛青煤。束縛同一車。胡爲乎來哉。泫然解其縛。清泉洗浮埃。枝葉傷尙困。生意未肯回。山僧老無子。養視如嬰孩。坐待老龍蛇。清陰滿南臺。孤根裂山石。直幹排風雷。我今百日客。養此千歲材。時去替不百日茯苓無消息。雙鬢日夜催。古今一俛仰。作詩寄餘哀。

以雙刀遺子由有詩次其韻

蘇軾

寶刀匣不見。但見龍雀鏤。何曾斬蛟蛇。亦未切琅玕。胡爲穿窬輩。見之要領寒。吾刀不汝問。有愧在其肝。念此刀自藏。包之虎皮斑。湛然如古井。終歲不復瀾。不憂無所用。憂在用者難。佩之非其人。匣中自長歎。我老衆所易。屢遭非意干。惟有王玄通。塔庭秀枝蘭。知子後必大。故擇刀所便。屠狗非不用。一歲六七刵。欲試百鍊剛。要須更泥蟠。作詩銘其背。以待知者看。

與王郎中昆仲及兒邁遶城觀荷花二首

蘇軾

昨夜雨鳴渠。曉來風襲月。蕭然欲秋意。溪水清可啜。環城三十里。處處皆佳絕。蒲蓮浩如海。時見舟一葉。此間真避世。青蒨低白髮。相逢欲相問。已逐鷺鷥沒。清風定何物。可愛不可名。所至如君子。草木有嘉聲。我行本無事。孤舟任斜橫。中流自偃仰。適與風相迎。舉杯屬浩渺。樂此兩無情。歸來兩溪間。雲水夜自明。

送俞節推字退翁之子尙

蘇軾

吳興有君子。淡如朱絲琴。一唱三歎息。至今有遺音。嗟余與夫子。相避如參辰。退翁官于蜀余在京師余歸而退翁去及余官于吳

與則退。猶喜見諸郎。窈然清且深。異時多良士。末路喪初心。我生不有命。其肯枉尺尋。

東坡七首

蘇軾

余至黃二年。日以困匱。故人馬正卿哀余乏食。爲於郡中請故營地數十畝。使得躬耕其中。地既久荒。爲茨棘瓦礫之場。而歲又大旱。墾闢之勞。筋力殆盡。釋耒而歎。乃作是詩。自懲其勤。庶幾來歲之入。以忘其勞焉。

廢壘無人顧。頽垣長蓬蒿。誰能捐筋力。歲晚不償勞。獨有孤旅人。天窮無所逃。端來拾瓦礫。歲旱土不膏。崎嶇草棘中。欲刮一寸毛。喟然釋耒歎。我廩何時高。

荒田雖浪莽。高庫各有適。下隰種秔稻。東原蒔棗栗。江南有蜀土。桑果已許乞。好竹不難栽。但恐鞭橫逸。仍須卜佳處。規以安我室。家僮燒枯草。走報暗井出。一飽未敢期。瓢飲已可必。

自昔有微泉。來從遠嶺背。穿城過聚落。流惡壯蓬艾。去爲柯氏陂。十畝魚蝦會。歲旱泉亦竭。枯萍粘破塊。昨夜南山雲。雨到一犁外。泫然尋故瀆。知我理荒蕪。泥芹有宿根。一寸嗟獨在。雪芽何時動。春鳩行可膾。

蜀人貴芹芽膾雜鳩肉作之

種稻清明前。樂事我能數。毛雨暗春澤。針水聞好語。蜀人以細雨爲雨毛。稻初生時。農夫相語。稻針水矣。分秧及初夏。漸喜風葉舉。

月明看露上一。一垂珠縷。秋來霜穗重。顛倒相撐拄。但聞畦隴間。蚱蟻如風雨。蜀中稻熟時。蚱蟻羣飛。田間如小蛙狀。而不害稻。

新春便入甑。玉粒照筐筥。我久食官倉。紅腐等泥土。行當知此味。口腹吾已許。

良農惜地力。幸此十年荒。桑柘未及成。一麥庶可望。投種未逾月。覆塊已蒼蒼。農夫告我言。勿使苗葉昌。

君欲富餅餌。要須縱牛羊。再拜謝苦言。得飽不敢忘。

種棗期可剝。種松期可斲。事在十年外。吾計亦已懣。十年不足道。千載如風電。舊聞李衡奴。此策擬可學。

我有同舍郎。官居在瀟岳。李公擇也遺我三寸柑。照坐光卓犖。百栽儻可致。當及春冰渥。想見竹籬間。青黃垂

屋角。

潘子久不調。沾酒江南村。郭生本將種。賣藥西市垣。古生亦好事。恐是押衙孫。家有十畝竹。無時容扣門。我窮交舊絕。三子獨見存。從我於東坡。勞餉同一殮。可憐杜拾遺。事與朱阮論。吾師卜子夏。四海皆弟昆。

冬至日贈安節

蘇軾

我生幾冬至。少小如昨日。當時事父兄。上壽拜脫膝。十年閱凋謝。白髮催衰疾。瞻前惟兄三。顧後子由一。近者隔濤江。遠者天一壁。今朝復何幸。見此萬里姝。憶汝總角時。啼笑爲梨栗。今來能慷慨。志氣堅鐵石。諸孫行復爾。世事何時畢。詩成卻超然。老淚不成滴。

陳季常見過二首

蘇軾

仕宦常畏人。退居還喜客。君來輒館我。未覺雞黍窄。東坡有奇事。已種十畝麥。但得君眼青。不辭奴飯白。送君四十里。只使一帆風。江邊千樹柳。落我酒盃中。此行非遠別。此樂固無窮。但願長如此。來往一生同。

初秋寄子由

蘇軾

百川日夜逝。物我相隨去。惟有宿昔心。依然守故處。憶在懷遠驛。閉門秋暑中。藜羹對書史。揮汗與子同。西風忽淒厲。落葉穿戶牖。子起尋袂衣。感歎執我手。朱顏不可恃。此語君勿疑。別離恐不免。功名定難期。

當時已悽斷。況此兩衰老。失塗既難追。學道恨不早。買田秋已議。築室春當成。雪堂風雨夜。已作對牀聲。

過建昌李野夫公擇故居

蘇軾

彭蠡東北源。廬阜西南麓。何人脩水上。種此一雙玉。思之不可見。破宅餘脩竹。四鄰戒莫犯。十晦森似束。我來仲夏初。解籜呈新綠。幽鳥向我鳴。野人留我宿。裴回不忍去。微月挂喬木。遙想他年歸。解組巾一幅。對牀老兄弟。夜雨鳴竹屋。臥聽鄰寺鐘。書窗有殘燭。

栖賢三峽橋

蘇軾

吾聞太山石。積日穿綫溜。況此百雷霆。萬世與石鬪。深行九地底。險出三峽右。長輪不盡溪。欲滿無底竇。跳波翻潛魚。震響落飛狖。清寒入山骨。草木盡堅瘦。空蒙煙靄間。瀕洞金石奏。彎彎飛橋出。斂斂半月殼。玉淵神龍近。雨雹亂晴晝。垂瓶得清甘。可噉不可嗽。

高郵陳直躬處士畫鴈

蘇軾

野鴈見人時。未起意先改。君從何處看。得此無人態。無乃槁木形。人禽兩自在。北風振枯葦。微雪落璀璨。慘澹雲水昏。晶熒沙礫碎。弋人悵何慕。一舉眇江海。

次韻王覲正言喜雪

蘇軾

聖人與天通。有詔寬獄市。好語夜喧街。濕雲朝覆砌。紛然退朝後。色映宮槐媚。欲夸翦刻工。故上朱藍袂。我方執筆侍。未敢書上瑞。君猶伏閣爭。高論亦少慰。霏霏止還作。盎盎風與氣。神龍久潛伏。一怒勢必倍。行當見三白。拜舞謹萬歲。歸來飲君家。酣詠追旣醉。

故李承之待制六丈挽詞

蘇軾

青青一寸松。中有梁棟姿。天驥墮地走。萬里端可期。世無阿房宮。可建五丈旗。又無穆天子。西征燕瑤池。材大古難用。老死亦其宜。丈夫恐不免。豈患莫已知。公如松與驥。少小稱偉奇。俯仰自廊廟。笑談無羗夷。清朝竟不用。白首仍憂時。願斬橫行將。請烹乾沒兒。言雖不見省。坐折姦雄窺。嗟我去公久。江湖生白髭。歸來耆舊盡。零落存者誰。比公嵇中散。龍性不可羈。疑公李北海。慷慨多雄詞。淒涼五君詠。沉痛八哀詩。邪正久乃明。人今屬公思。九原不可作。千古有餘悲。

送范純粹守慶州

蘇軾

才大古難用。論高常近迂。君看趙魏老。乃爲滕大夫。浮雲無根蒂。黃潦能須臾。知經幾成敗。得見真賢愚。羽旄照城闕。談笑安邊隅。當年老使君。赤手降於菟。諸郎更何事。折箠鞭其雛。吾知鄧平叔。不鬪月支胡。送千乘千能兩姪還鄉

蘇軾

治生不求富。讀書不求官。譬如飲不醉。陶然有餘歡。君看龐德公。白首終泥蟠。豈無子孫念。顧獨遺以安。鹿門上冢回。牀下拜龍鸞。躬耕竟不起。耆舊節獨完。念汝少多難。冰雪落綺紈。五子如一人。奉養眞色難。烹雞獨食母。自饗苜蓿盤。口腹恐累人。寧我食無肝。西來四千里。敝袍不言寒。秀眉似我兄。亦復心閑寬。忽然捨我去。歲晚留餘酸。我豈軒冕人。青雲意先闌。汝歸蒔松菊。環以青琅玕。愷陰三年成。可以挂我冠。清江入城郭。小圃生微瀾。相從結茅舍。曝背談金鑾。

故周茂叔先生濂溪

蘇軾

世俗眩名實。至人疑有無。怒移水中蟹。愛及屋上烏。坐令此溪水。名與先生俱。先生本全德。廉退乃一隅。因拋彭澤米。偶似西山夫。遂卽世所知。以爲溪之呼。先生豈我輩。造物乃其徒。應同柳州柳。聊使愚溪愚。

歐陽叔弼見訪道陶淵明事因語及元載之死歎其識有淺深退作此詩

蘇軾

淵明求縣令。本緣食不足。束帶向督郵。小屈未爲辱。飜然賦歸去。豈不念窮獨。重以五斗米。折腰營口腹。如何元相國。萬鍾不滿欲。胡椒銖兩多。何用八百斛。以此殺其身。何啻抵鵠玉。往者不可悔。吾其返自燭。

竹間亭小酌懷歐陽叔弼季默呈趙景貺陳履常一首

蘇軾

歲暮自急景。我閑方緩觴。醉餘西湖晚。步轉北渚長。地坐略少長。意行無澗岡。久知薺麥清。稍喜榆柳黃。盎盎春欲動。漱漱夜未央。水天鷗鷺靜。月霧松檜香。撫景方婉婉。懷人重淒涼。豈無一老兵。坐念兩歐陽。我意正麋鹿。君才亦圭璋。此會恐難久。此歡不可忘。

東府雨中別子由

蘇軾

庭下梧桐樹。三年三見汝。前年適汝陰。見汝鳴秋雨。去年秋雨時。我自廣陵歸。今年中山去。白首歸無期。客去莫歎息。主人亦是客。對牀定悠悠。夜雨空蕭瑟。起折梧桐枝。贈汝千里行。歸來知健否。莫忘此時情。

過高郵寄孫君孚

蘇軾

過淮風氣清。一洗塵埃容。水木漸幽茂。菰蒲雜游龍。可憐夜合花。青枝散紅茸。美人遊不歸。一笑當誰供。故園在何處。已偃手種松。我行忽失路。歸夢山千重。聞君有負郭。二頃收橫從。卷野畢秋穫。殷牀聞夜春。樂哉何所憂。社酒粥面釀。宦遊豈不好。毋令到千鍾。

次韻定慧欽老見寄

蘇軾

閑居蓄百毒。救此跛與盲。依山作陶穴。掩此暴骨橫。區區效一溉。豈能濟含生。力惡不已出。時哉非汝爭。

江月五首

蘇軾

嶺南氣候不常。吾嘗云菊花開時乃重陽。良天佳月。卽中秋不須以日月爲斷也。今歲九月。殘暑方退。既望之後。月出愈遲。然予嘗夜起登合江樓。或與客遊豐湖。入栖禪寺。扣羅浮道院。登逍遙堂。逮曉乃歸。杜子美云。四更山吐月。殘夜水明樓。此殆古今絕唱也。因其句作五首。仍以殘夜水明樓爲韻。

一更山吐月。玉塔臥微瀾。正似西湖上。湧金門外看。冰輪橫海闊。香霧入樓寒。停鞭且莫上。照我一杯殘。
二更山吐月。幽人方獨夜。可憐人與月。夜夜江樓下。風枝久未停。露草不可藉。歸來掩關臥。唧唧蟲夜話。
三更山吐月。栖鳥亦驚起。起尋夢中遊。清絕正如此。驅雲掃衆宿。俯仰迷空水。幸可飲我牛。不須違洗耳。
四更山吐月。皎皎爲誰明。幽人赴我約。坐待玉繩橫。野橋多斷板。山寺有微行。今夕定何夕。夢中遊化城。
五更山吐月。窻迥室幽幽。玉鉤還挂戶。江練卻明樓。星河澹欲曉。鼓角冷知秋。不眠翻五詠。清切變蠻謳。

遷居之夕聞鄰舍兒誦書欣然而作

蘇軾

幽居亂蛙黽。生理半人禽。蹙然已可喜。況聞弦誦音。兒聲自圓美。誰家兩青衿。且欣習齊咻。未敢笑越吟。九齡起韶石。姜子家日南。吾道無南北。安知不生今。海闊尙挂斗。天高欲橫參。荆榛短牆缺。燈火破屋深。引書與相和。置酒仍獨斟。可以侑我醉。琅然如玉琴。

次韻子由所居

蘇軾

幽居有古意。義井分西牆。誰言三伏熱。止須一杯涼。先生坐忍渴。羣鷺自披猖。衆散徐酌飲。逡巡味尤長。

和陶淵明飲酒

蘇軾

道喪士失己。出語輒不情。江左風流人。醉中亦求名。淵明獨清真。談笑得此生。身如受風竹。掩冉衆葉驚。俯仰各有態。得酒詩自成。

和陶淵明怨詩楚調示龐主簿及鄧治中

蘇軾

當歡有餘樂。在戚亦頽然。淵明得此理。安處固有年。嗟我與先生。所賦良奇偏。人間少宜適。惟有歸耘田。我昔墮軒冕。毫釐真市廛。歸來臥重茵。憂愧自不眠。如今破茅屋。一夕或三遷。風雨睡不知。黃葉滿枕前。寧當出怨句。慘慘如孤煙。但恨不早悟。猶推淵明賢。

和陶淵明雜詩

蘇軾

眞人有妙觀。俗子多妄量。區區勸粒食。此豈知子房。我非徒跣相。終老懷未央。免死縛淮陰。狗功指平陽。哀哉亦可羞。世路皆羊腸。

和陶淵明庚戌歲九月中於西田穫早稻

蘇軾

蓬頭二獠奴。誰謂愿且端。晨興洒掃罷。飽食不自安。願此治圃畦。少資主遊觀。晝功不自覺。夜氣乃潛還。早韭欲爭春。晚菘先破寒。人間無正味。美好出艱難。早知農圃樂。豈有非意干。尙恨不持鋤。未免駢我顏。此心苟未降。何適不間關。休去復歇去。食菜何所歎。

和陶淵明始作鎮軍參軍經曲阿

蘇軾

虞人非其招。欲往畏簡書。穆生責醴酒。先見我不如。江左古弱國。強臣擅天衢。淵明墮詩酒。遂與功名疎。我生值良時。朱金義當紆。天命適如此。幸收廢棄餘。獨有愧此翁。大名難久居。不思犧牛龜。兼取熊掌魚。北郊有大賚。南冠解囚拘。眷言羅浮下。白鶴返故廬。

和陶淵明詠三良

蘇軾

此生太山重。忽作鴻毛遺。三子死一言。所死良已微。賢哉晏平仲。事君不以私。我豈犬馬哉。從君求蓋帷。殺身固有道。大節要不虧。君爲社稷死。我則同其歸。顧命有治亂。臣子得從違。魏顆真孝愛。三良安足希。仕宦豈不榮。有時纏憂悲。所以靖節翁。服此黔婁衣。

和陶淵明詠貧士

蘇軾

夷齊恥周粟。高歌誦虞軒。產祿彼何人。能致綺與園。古來避世士。死灰或餘煙。末路益可羞。朱墨手自妍。淵明初亦仕。弦歌本誠言。不樂乃徑歸。視世差獨賢。

夏晝

章望之

一日常百刻。轉若車輪忙。千日十萬刻。百年能幾長。達者齊古今。一生甚微茫。夏日豈爲永。而足以較量。人世不足惜。行善乃自彰。無及間暇時。般樂爲淫荒。夷齊餓人者。顏閔非公王。其人品孰亞。周氏與虞唐。亦用仁義積。豈今身未亡。富貴無可恃。莫與公道強。夜思晝以力。四序皆流光。示君夏晝誦。惕惕其自傷。

宿簡寂觀

袁陟

名山崇祕祠。終夜得清賞。真氣溢空浮。流泉隨砌響。林巒片月散。殿閣高風行。天際斗杓直。庭中盤石橫。

即陸脩靜
朝斗之石。逸人今何之。故嶺不改秀。白鶴淚松梢。青燈覩巖竇。悅追汗漫駕。深悟逍遙言。四顧羣動寂。冥心歸灝元。

再遊雲居

登山有三路。去冬自蒞潭。由西莊而取姚田莊路。唯麥莊一路未行。

袁陟

風吹嶺頭樹。似欲招行客。綠雲過絕頂。復見紫霄宅。平觀三百里。下視八千尺。隼擊九秋嚴。鵬展萬里翮。五老鎮相望。西岫天與敵。可笑培塿羣。亦自矜寸碧。氛埃卷宇宙。鴈鷺下川澤。既諧慧智心。若蹈聖賢域。危亭據中峯。回抱竦天壁。沈沈古帝坐。左右列夔稷。舉頭河漢通。直欲攀南極。合奏天地籟。兩耳清歷歷。吁嗟萬類微。胡爲競朝夕。安知太清上。我方適所適。尙思西巘路。去冬躡雙屐。高興挹洪厓。大句鼓天力。到今巖壑間。浩浩起金石。安得少陵翁。物外講新格。重來羈縲在。欲隱世累迫。多謝受命松。長存歲寒色。

覆驗餘姚道中

王存

一夫死非命。滌驗更兩吏。一囚坐法誅。三覆與衆棄。去年交趾敗。殺戮無賤貴。江淮屢歲眚。積殍溝壑穢。聖人於赤子。愛重若彼至。謹小以遺大。誰其原帝意。

雜興三首

鮮于侁

幽居觀物變。天道固虛盈。炎馭日方熾。微陰一已生。涼風動野草。桃李先飄零。蝸蟻集高柳。絡緯響空庭。愁心獨耿耿。宵夢竟難成。一氣斡元造。爲功未嘗煩。羣生自委化。天地亦何言。鳧脛不可增。楮葉不可鑄。欲益固爲損。勞心非自然。不見平陽侯。醇酒聊終年。

三王貴養老。取重在乞言。酒醴副佳肴。黃髮斯皤然。朝廷本忠厚。風俗亦變遷。豈意漢道微。侍中惟少年。耆舊無備問。李公所以難。

新堂夜坐月色皎然由連理亭信步庭中徘徊久之因爲五言一首

鮮于侁

秋風動微涼。天雨新霽後。閑齋獨隱几。明月在高柳。振衣步庭下。顛氣入襟袖。天空雲漢明。隱約辨列宿。蒼蒼松檜上。零露霏欲流。去聲脫葉滿閑園。繁華迫衰朽。清宵望蟾彩。宜付一杯酒。多病謝樽壘。城頭轉寒漏。

海州觀放鵲搏兔不中而飛去

沈存中

秋霜濯空林。暮日在峯頂。冥冥起長風。稍稍絕遺影。驍禽值猛搏。俯取不待頃。豈非求者乖。矯翮成遠聘。未能謝榛莽。那用遽悻悻。此心竟可憐。得失未宜病。

觀餘姚海氛

謝景初

海上風與雨。未睽先氣升。澤鹵雜山雲。蒼鬱相薰蒸。交語面已障。安辨丘與陵。衣濡帶革緩。臭腥殊可憎。自非昌其陽。疾癘得以乘。君子卻陰邪。何必醫師能。

餘姚董役海隄有作

謝景初

五行交相陵。海水不潤下。處處壞隄防。白浪大於馬。顧予爲其長。恐懼敢暫捨。董衆完築塞。跋履率曠野。使人安於生。茲不羞民社。調和陰與陽。自有任責者。

法喜堂

謝景初

虛堂庇風雨。結構高宗御諱不務壯。外飾無髣髴。置物況容長。開篋藥劑靈。拈葦白黑抗。階花澹亦天。庭石碧海。上。

村居

文與可

日影滿松窗。雲開雨初止。晴林梨棗熟。曉巷兒童喜。牛羊深澗下。鳧鴈寒塘裏。田父酒新成。瓶甕饋鄰里。

新晴山月

文與可

高松漏疎月。落影如畫地。徘徊愛其下。夜久不能寐。怯風池荷捲。病雨山果墜。誰伴予苦吟。滿林啼絡緯。

屬疾梧軒

文與可

高梧覆新葉。滿院發華滋。白日一何永。清陰閑自移。暖蟲垂到地。晴鳥語多時。病肘倚枯几。泊然忘所思。

宋文鑑卷第十九

五言古詩

買炭

早行

逍遙亭二首

師道

過百里大夫冢

寄秉夷

和子瞻粲字韻二首

寄師載

過冢

上冢

題王黃州墨蹟後

和張文潛贈晁無咎二首

留王郎

蘇轍

孔文仲

潘興嗣

潘興嗣

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

和孔常父雪

黃庭堅

次韻答邢光宗御諱夫

黃庭堅

題竹石牧羊

黃庭堅

贈秦少儀

黃庭堅

謝公定和二范秋懷

黃庭堅

宿舊彭澤懷陶令

黃庭堅

題宛陵張待舉曲肱亭

黃庭堅

和邢光宗御諱夫秋懷

黃庭堅

次謝與迪所作竹

黃庭堅

次韻楊明叔見錢十首

黃庭堅

拜劉凝之畫像

黃庭堅

跋子瞻和陶詩

黃庭堅

次徐仲車因婁行父見寄之詩

黃庭堅

遊蔣彥回玉芝園

黃庭堅

沐浴有感

彭汝礪

就食

楊蟠

古興

濉陽

別三子

示三子

田家

送蘇公知杭州

送李奉議亳州判官

觀堯文忠公家六一堂圖書

咸平讀書堂

次韻答晁無斁

買炭

苦寒搜病骨。絲纒莫能禦。析薪燎枯竹。勃鬱煙充宇。西山古松櫪。材大招斤斧。根槎委溪谷。龍伏熊虎踞。挑挾靡遺餘。陶穴付一炬。積火變深黧。牙角猶忿怒。老翁睡破氈。正晝出無屨。百錢不滿籃。一坐幸至莫。御爐歲增貢。圓直中常度。閭閻不敢售。根節姑付汝。升平百年後。地力已難富。知夸不知嗇。俛首欲誰訴。百物今盡然。豈惟一炭故。我老或不及。預爲子孫懼。

早行

沈遼

徐積

陳師道

陳師道

陳師道

陳師道

陳師道

陳師道

陳師道

陳師道

蘇轍

孔文仲

客與謂已旦。出視見落月。瘦馬入荒陂。霜花重如雪。海風吹萬里。兩耳凍幾脫。歲晏已苦寒。近北尤凜冽。況當清曉行。遡此原野闊。笠飛帶繞頸。指強不得結。農家煙火微。炙手粗可熱。豈能迂我留。而就苟且活。仰頭視四字。夜氣亦漸豁。苦心待正晝。白日想不缺。

逍遙亭

潘興嗣

作亭名逍遙。此理誠不虛。寬於一天下。原憲惟桑樞。況我卜清曠。風雨庇有餘。方池容瀲灩。小徑足縈迂。花木頗窈窕。松筠亦扶疎。鳴蛙送鼓吹。好鳥來笙竽。可琴亦可詠。可飲亦可娛。盤雖無下筯。賓食亦有魚。恢論或申旦。隱几忘移晷。困來展足眠。醉倒從人扶。率爾但付暢。因煩而領無。鄴侯三萬軸。方朔五車書。棄置復棄置。任自相賢愚。無妨吾逍遙。此樂誠何如。

師道

潘興嗣

師道久不振。小儒咸自私。破崖求圭角。務出已新奇。惻惻去聖遠。六經秦火墮。不有傳授學。涉獵安所爲。漢儒守一經。學者如雲隨。承習雖未盡。摸法有根基。薦紳立朝廷。開口應萬機。附對皆據經。金石確不移。熟爛見本末。較然非可欺。吾願下學官。各立一經師。務盡道德業。不取章句辭。庶幾昔人風。炳然復在茲。

過百里大夫冢

黃庭堅

行客抱憂端。況復思古人。何年一丘土。不見石麒麟。斷碑略可讀。大夫身霸秦。虞公納垂棘。將軍西問津。安知五羊皮。自粥千金身。末俗工媒孽。浮言妬道真。幸逢孟軻賞。不愧微子魂。

寄秉夷

黃庭堅

少時調詩書貫穿數萬字。爾來窺陳編。記一忘三二。光陰如可玩。老境翻手至。良醫曾折足。說病迺真意。

和子瞻粲字韻二首

黃庭堅

公材如洪河。灌注天下半。風日未嘗撓。晝夜聖所歎。名世二十年。窮無歌舞玩。入宮又見妬。徒友飛鳥散。一飽事難諧。五車書作伴。風雨暗樓臺。雞鳴自昏旦。雖非錦繡贈。欲報青玉案。文似離騷經。詩窺關雎亂。賤生恨晚學。曾未奉巾盥。昨蒙雙鯉魚。遠託鄭人緩。風義薄秋天。神明還舊貫。更磨薦彌墨。推挽起疲懦。忽忽未嗣音。微陽歸候炭。仁風從東來。拭目望齋館。鳥聲日日春。柳色弄晴暖。漫有酒盈樽。何因見此粲。元龍湖海士。毀譽各相半。下牀臥許君。上牀自永歎。丈夫屬有念。人物非所玩。坐令結歡客。化爲煙霧散。武功有大略。亦復寡朋伴。詠歌思見之。長夜鳴鷓旦。東南望彭門。官道平如案。簡書束縛人。一水不能亂。斯文媿秬鬯。可用圭瓚盥。誠求活國醫。何忍棄和緩。開疆日百里。都內錢朽貫。銘功甚俊偉。迺見儒生懦。且當置是事。勿求冰作炭。上帝羣玉府。道家蓬萊館。曲肱夏簟寒。炙背冬屋暖。只令文字垂。萬世星斗粲。

寄師載

黃庭堅

齊地穀翔貴。排門無饜饋。二仲有甘旨。奉親亦良勤。原田水洗洗。何時稼如雲。無民願豐歲。政自不忘君。

過家

黃庭堅

絡緯聲轉急。田車寒不運。兒時手種柳。上與雲雨近。舍傍舊傭保。少換老欲盡。宰木鬱蒼蒼。田園變畦畛。招延屈父黨。勞問走婚親。歸來翻作客。顧影良自哂。一生萍託水。萬事雪侵鬢。夜闌風隕霜。乾葉落成陣。燈花何故喜。大是報書信。親年當喜懼。兒齒欲毀亂。繫船三百里。去夢無一寸。

上冢

黃庭堅

自公返蓬華。稅駕上丘隴。霜露此日悲。松楸十年拱。養雛數羽毛。初不及承奉。康州斷腸猿。風枝割永痛。少年不如人。登仕無前勇。髮踈牙齒搖。鯨波怒號洶。願爲保家子。敢議世輕重。稱觴太夫人。魚菜贍庖供。

題王黃州墨蹟後

黃庭堅

掘地與斷木。智不如機舂。聖人懷餘巧。故爲萬物宗。世有斲泥手。或不待郢工。往時王黃州。謀國極匪躬。朝聞不及夕。百壬避其鋒。九鼎安盤石。一身轉孤蓬。浮雲當日月。白髮照秋空。諸君發蒙耳。汲直與臣同。

和張文潛贈晁無咎二首

黃庭堅

龜以靈故焦。雉以文故翳。本心如日月。利欲食之既。後生玩華藻。照影終沒世。安得八紘置。以道獵衆智。談經用燕說。束棄諸儒傳。濫觴雖有罪。未派瀾九縣。張侯真理窟。墜壁勿與戰。難以口舌爭。水清石自見。

留王郎

黃庭堅

河外吹沙塵。江南水無津。骨肉常萬里。寄聲何由頻。我隨簡書來。顧影將一身。留我左右手。奉承白頭親。小邦王事略。蟲鳥聲無人。王生解鞍馬。夜語雞喚晨。母慈家人肥。女慧男垂紳。有田爲酒事。豚韭及秋春。生涯得如此。舊學更光新。索去何草草。少留慰躑勤。百年才一炊。六籍經幾秦。要知胷中有。不與跡同陳。郢人懷妙質。聊欲運吾斤。

和孔常父雪

黃庭堅

春皇賦上瑞。來寧黃屋憂。下令走百神。大雲庇九丘。風聲將仁氣。醜醜生瓦溝。寒花舞零亂。表裏照皇州。

千門委圭璧。曉日不肯收。元年冬無澤。穴處長螟螽。兩宮初盱食。補袞獻良籌。有道四夷守。無征萬邦休。著年秉國論。涇渭極分流。輟耒入班品。逸民盡歸周。股肱共一體。間不容戈矛。人材如金玉。同美異剛柔。政須衆賢和。乃可踈共毆。改弦張弊法。病十九已瘳。王指要不匿。蝕非日月羞。桑林請六事。河水問九疇。天意果然得。玄功與吾謀。此物有嘉德。占年在麥秋。近臣知天喜。玉色動冕旒。儒館無他事。作詩配崇丘。

次韻答邢光宗御諱夫

黃庭堅

爲山不能山。過在一簣止。渥注麒麟兒。墮地志千里。岷山初濫觴。入楚乃無底。將升聖人堂。道固有廉陛。邢子好少年。如世有源水。方求無津涯。不作蛙井喜。兒中兀老蒼。趣造甚奇異。過閱王公門。袖中有漫刺。別來阻河山。望遠每障袂。斯文向千載。有志常寡遂。後生文楚楚。照影若孔翠。不應太玄草。晞價咸陽市。雨作枕簟秋。官閑省中睡。夢不到漢東。茗椀乃爲祟。聞君肺渴減。頗復佳食寐。讀書得新功。來鴈寄一字。

題竹石牧牛

黃庭堅

野次小嶧嶸。幽篁相依綠。阿童三尺箠。御此老叢棘。石吾甚愛之。勿遣牛礪角。牛礪角尚可。牛鬪殘我竹。

贈秦少儀觀

黃庭堅

汝南許文休。馬磨自衣食。但聞郡功曹。滿世名籍籍。渠命有顯晦。非人作通塞。秦氏多英俊。少游眉最白。頗聞鴻鴈行。筆皆萬人敵。吾蚤知有覲。而不知有覲。少儀袖詩來。剖蚌珠的歷。乃能持一鏃。與我箭鋒直。自吾得此詩。三日臥向壁。挽士不能寸。推去輒數尺。才難不其然。有亦未易識。

謝公定和二范秋懷

黃庭堅

西風一葉脫。迹已不可掃。巷有白馬生。朝回焚諫草。誰云事君難。是亦父子間。所要功補袞。不言能犯顏。
宿舊彭澤懷陶令

黃庭堅

潛魚願深渺。淵明無由逃。彭澤當此時。沉冥一世豪。司馬寒如灰。禮樂卯金刀。歲晚以字行。更始號元亮。淒其望諸葛。飢餓猶漢相。時無益州牧。指擡用諸將。平生本朝心。歲月閱江浪。空餘詩語工。落筆九天上。向來非無人。此友獨可尚。屬余剛制酒。無用酌盃盎。欲招千載魂。斯文或宜當。

題宛陵張待舉曲肱亭

黃庭堅

仲蔚蓬蒿宅。宣城詩句中。人賢忘巷陋。境勝失途窮。寒菹書萬卷。零亂剛直智。偃蹇勳業外。嘯歌山水重。晨雞催不起。擁被聽松風。

和邢光宗御諱夫秋懷二首

黃庭堅

王度無畦畛。包荒用憑河。秦收鄭渠成。晉得楚材多。用人當其物。不但軸與邁。六通而四關。玉燭四時和。相如用全趙。留侯開有漢。名登泰山重。功略天下半。讓頗封韓彭。事成羣疑泮。天道常曲全。小智驚後患。
次謝與迪所作竹

黃庭堅

吾宗墨脩竹。心手不自知。天公造化鑪。攬取如拾遺。風雪煙霧雨。榮悴各一時。此時抱明節。君又潤色之。抽萌或發石。懸箠有隄危。林梢一片雨。造次以筆追。猛吹萬籟作。微涼大音稀。霜兔束豪健。松煙泛硯肥。盤桓未落筆。落筆必中宜。今代捧心學。取笑如東施。或可遺巾幘。選慳如辛毗。生枝不應節。亂葉無所歸。非君一起予。衰疾豈能詩。憶君初解鞍。新月挂彎眉。夜月上金鏡。坐歎光景馳。我有好東絹。清明要會期。

漪漪淇園姿。此君有威儀。願作數百竿。水石相因依。他年風動塵。洗我別後思。開圖慰滿眼。何時遂臻茲。

次韻楊明叔見餞十首

黃庭堅

平津喜牧豕。飲飛能斬蛟。終藉一汲黯。淮南解兵交。楊子有直氣。未忍死草茅。引之入漢朝。誰爲續弦膠。楊君清渭水。自流濁涇中。今年貧到骨。豪氣似元龍。男兒生世間。筆端吐長虹。何事與秋螢。爭光蒲葦叢。事隨世滔滔。心欲自得得。楊君爲己學。度越流輩百。坐捫故衣蝨。垢襪春汗黑。睥睨執袴兒。可飲三斗墨。清淨草玄學。西京有子雲。太尉死宗社。大鳥泣其墳。寂寥向千載。風流被仍昆。富貴何足道。聖處要策勳。桑輿金石交。既別十日雨。子輿裹飯來。一笑相告語。楊君困箠瓢。諸公不能舉。儻可從我歸。沙頭駐鳴櫓。山園少天日。狐鬼能作妖。閃閃載一車。獵人用鳴梟。小智窘流俗。蹇淺不能超。安得萬里沙。霜晴看射鵰。元之如砥柱。大年若霜鷗。王楊立本朝。舉世作郭郭。觀公有膽氣。似可繼前作。丈夫存遠大。胷次要落落。虛心觀萬物。險易極變態。皮毛剝落盡。唯有眞實在。侍中乃珥貂。御史卽冠豸。顧影或可羞。短蓑釣寒澗。松柏生澗壑。坐閱草木秋。金石在波中。仰看萬物流。骯髒自骯髒。伊優自伊優。但觀百世後。傳者非公侯。老作同安守。塞足信所便。胷中無水鏡。敢當吏部銓。恨此虛名在。未脫世糾纏。念作白鷗去。江南水如天。

拜劉凝之畫像

黃庭堅

棄官清潁尾。買田落星灣。身在菰蒲中。名滿天地間。誰能四十年。保此清淨退。往來澗谷中。神光射牛背。

跋子瞻和陶詩

黃庭堅

子瞻謫嶺南。時宰欲殺之。飽喫惠州飯。細和淵明詩。彭澤千載人。東坡百世士。出處雖不同。風味乃相似。

次徐仲車因襄行父見寄之詩

黃庭堅

前朝老諸生。大半正丘首。投荒萬里歸。煩公問健否。往時望江宰。今爲夏津吏。它日可教之。玉音尙無棄。

遊蔣彥回玉芝園

黃庭堅

春生瀟湘水。風鳴澗谷泉。過雨花漠漠。弄晴絮翩翩。名園上朱閣。觀後復觀前。借問昔居人。岑絕無炊煙。人生須富貴。河水清且漣。百年共如此。安用涕潺湲。蔣侯真好事。杖屨喜接連。車載溪中骨。堆排若差肩。厭看孔壬面。醜石反成妍。感君勸我醉。吾亦無間然。亂我朱碧眼。空花墜便翾。行動須人扶。那能金石堅。愛君雷式琴。湯湯發朱弦。但恨賞音人。太平隨逝川。平生有詩病。如瘡不可痊。今當痛自改。三釁復三瀕。

沐浴有感

彭汝礪

去垢如去邪。不欲留毫分。髮不止一沐。身不止三熏。如何迷本原。浴德不自勤。區區養槭棘。俯仰愧前聞。

就食

楊蟠

未知田上勞。徒厭鼎中味。及與農事接。方驚食者貴。余生寡營求。念此豈易致。況敢懷寸祿。平居但羞愧。

古興

沈遼

我不歎白髮。安得新少年。往者不失勢。後來豈能賢。世間亦多士。倚伏良有緣。寄語夸奪子。古人已皆然。

灘陽

徐積

嘗聞唐李氏。世號爲賢妻。以力營七喪。或謂難庶幾。孰知蔡家婦。其事乃同之。豈特在中饋。無往而無儀。孝於其所尊。慈於其所卑。旣知義所在。能終義所爲。我生至此極。我嫁逢百罹。其屬死略盡。其骨俱無歸。

身爲未亡人。心乃眞男兒。以己任其責。無忘須臾時。但恐事不濟。安知恤寒飢。乃捐奉生具。而爲送亡資。面不御膏沐。首不加冠笄。金珠鬻於市。文繡容何施。更無囊中裝。唯有身上衣。殆將截其髮。幸苟完其肌。所得蓋良苦。所積從細微。如此十年久。猶以爲支離。日時卜諸良。宅兆相厥宜。一舉十八喪。一旦得所依。手自植松楸。身亦沾塗泥。何暇裹兩足。但知勤四肢。居者歎於室。行者泣於岐。烏亦助叫號。人思操藁糞。冥冥長夜魂。所獲喜可知。鬱鬱佳城中。不爲中道尸。卒辦其家事。少慰而心悲。義深海可涸。行堅山可摧。孤誠貫白日。幽光凌虹蜺。吾聞古烈女。犖犖非無奇。一死盡易處。一節亦易持。至如張氏者。使人尤歎欬。誰爲孝婦傳。誰爲黃絹碑。亦有淮上翁。爲述濉陽詩。移書太史氏。無令茲逸遺。

別三子

陳師道

夫婦死同穴。父子貧賤離。天下寧有此。昔聞今見之。母前三子後。熟視不得追。嗟乎胡不仁。使我至於斯。有女初束髮。已知生離悲。枕我不肯起。畏我從此辭。大兒學語言。拜揖未勝衣。喚爺我欲去。此語那可思。小兒襁褓間。抱負有母慈。汝哭猶在耳。我懷人得知。

示三字

陳師道

去遠卽相忘。歸近不可忍。兒女已在眼。眉目略不省。喜極不得語。淚盡方一哂。了知不是夢。忽忽心未穩。

田家

陳師道

雞鳴人當行。犬鳴人當歸。秋來公事急。出處不待時。昨夜三尺雨。竈下已生泥。人言田家樂。爾苦人得知。

送蘇公知杭州

陳師道

平生羊荊州。追送不作遠。豈不畏簡書。放麀誠不忍。一代不數人。百年能幾見。昔如馬口銜。今爲禁門鍵。一雨五月涼。中宵大江滿。風帆日力短。江空歲年晚。

送李奉議亳州判官

陳師道

祁氏號外府。藏室多異書。自公有餘力。一覽意何如。爲學雖日益。受益不受誣。正須高著眼。濠梁有遊魚。觀竟文忠公家六一堂圖書

陳師道

生世何用早。我已後此翁。頗識門下士。略已聞其風。中年見二子。已復歲一終。呼我過其廬。所得非所蒙。先朝羣玉殿。冠佩環羣公。神文煥王度。喜色見天容。御榻誰復登。帝書元自工。黃絹兩大字。一覽涕無從。似欲託其子。天意人與同。歷數況有歸。敢有貪天功。集古一千卷。明明並羣雄。誰爲第一手。未有百世公。廟器刻科斗。寶樽播華蟲。緬懷弁服士。酬獻鳴璫瑤。插架一萬軸。遺子以固窮。素琴久絕弦。棊酒頗闕供。向來一瓣香。敬爲曾南豐。世雖嫡孫行。名在惡子中。斯人日已遠。千歲幸一逢。吾老不可待。草露濕寒蛩。

咸平讀書堂

陳師道

昔人三百篇。善世已有餘。後生守章句。不足供嘔噓。一登吏部選。筆硯隨掃除。閉閣畫眉嫵。隔屋聞歌呼。奉公用漢律。寧復要詩書。俛首出跨下。枉此七尺軀。今代陶朱公。不作大梁屠。計然特未用。意得輕全吳。爲邦得畿縣。政密自計踈。寧書下下考。不奉急急符。用意簿領外。築室課典謨。平生五千卷。還舍不問途。舊事更漢唐。稍以詩自娛。復作無事飲。醉臥擁青奴。桃李春事繁。軒窗晝景舒。鳴屋鳩喚雨。窺簷燕哺雛。休吏散篇帙。脩篁獻笙竽。听然一啓齒。斯民免爲魚。

次韻答晁無斁

陳師道

女生願有家。名妾以不聘。田里亦慕君。又惡不由正。欲行不問塗。已破寧顧飯。耕蠶無一廛。庖井要三徑。還家憂患餘。挽須兒女競。十年寧有此。一寒可無命。平生晁夫子。得士公室慶。稍無車馬音。復作賓客請。論文到韓李。念舊說蘇鄭。長年斷消息。獨語誰和應。此生恩未報。他日目不瞑。歸臥無好懷。扣門有佳聽。誰來雪霜後。更覺天宇淨。少好老未工。持刃授子柄。

